

Makna Yesusmoa. Yesusva Nengthal Lohv, Sesoana Moalamangva Kuvuwulluhv.

Yon Baptaisva Seilva Sesoana Moamba Ishul-prunna Indhanamba.

Matiu 3:1-12, Luk 3:1-9 eva 3:15-17, Yon 1:19-28

¹ Hona tombairava memba plalmomba lohvpa, Yesus Kristusna nemelmoa besalva seilva phona, noi Yesus Kristus Sesoana ombol. ² Nemetva Aisa-ava moashulnindriniva novol vena os,

Sesoava ombolm omnana, hello kam, yemba si kava kavna andram wolaihangavav, wo kavna moashulnindrinim si kava osva wolaihangavav, wo he miva gavav, yena monamba vuenghungavav.

Malakai 3:1 ³ Wo doa hev si gavav, wo di indhanahuiram amana vevav, wo indhanam di nembao mana vevav, os mendekliva doa mura prolm vev. Yeo monaoa vuenghimnivm, wo mendekliva beswonamba yeindamba si siheinvav.

Aisaia 40:3

⁴ Doa Aisaiaava os doarava no Sesoana moamba novol vena, wo osva Yon Baptaisva sism wohengvna. Hev phonamba, di indhanahuir amana vevna. Wo no Yonmba indhanam ishomana vinvna os, yeo sahoklamoa wuleihu. Yimba osva vivrava, yemba kava os pona poswol vevav. Manara, yena sahoklava mindnam luhunv

Sesoana novra, wo himba si os nomba yenamba maisasa vrinvav, hengava nengvavmoa.

⁵ Wo Yutanind indkumbi, Yerusalem kembellnind indkumbi embauvmona vevna, Yonm di nonglapulvulvohvna, wo hena moamba hillivnamba, wo hevna indkoklamom moakus umnivna, wo Yon nomba pona poswol vinvna. Os vivna di Yotan pora. ⁶ Yonna wevsava os, kayen vethulamana vevna, kayenmba nomba tatana talna vina, besalva owai. Wo innemba noi Yonmba naomana vevna sungeitinne, vevna meleumb, eva yuhvsu. Honi Yonna inne kayen os lohna, os Sesoana moashulnindva doarava os vivna.

⁷ Wo Yon indhanam ishomana vinvna, os si mongova indhanariniva sis provav, wo kava hena anglasingi lohv. Kava indhanakola ambo, wo he kamba wohkuvhoavav. ⁸ Kava yemba daipotava ponangas poswol vaomana vev, heva os hena andrava si mendekli phovav, wo hena moara Sesoasongolva yena nihmerava sihaomana vivav. Doa yimba si os henanapol wohaevvav.

Yon Baptaisva Yesusmba Pona Posvena.

Matiu 3:13-17, Luk 3:21-22

⁹ Doa nonamba Yesusva hevnamin Nasaret kembellini venamba Galili provinsriniva, wo Yotan pora Yonm nonglapho, wo himba Yesusmba pona posvena. ¹⁰ Wo Yesusva porini meillam vonganamba, doa os nonglana, ovrava mel lohvna, wo noshara Sesoasongol holope leumbna nihna, wo Yesusina avhoana. ¹¹ Wo Yesusva Sesoam ovrini hellena, os yimba kana mongal ombol, yem kava mindnam indk vethamnav.

*Setanmba Yesusmba Lehsambaihana.
Matiu 4:1-11, Luk 4:1-13*

¹² Wo Yonmba Yesusmba pos vepianamba pona, doa lelnam Sesoasongol Yesusm wuhhona, indhanahuiram gawe. ¹³ Wo noinda Yesusva indhanahuiram gana, wo simba 40pelara lohmanavna diva. Wo diva himba Setanm nonglapho, no Setanmba Sesoana ungund. Wo himba Yesusm newondmona isholohmanavna. Yesusva di indhanahuira amana vevna, di ten sungeitwindeva sahoklal luhungu vevnam, wo Sesoana ovsongolnind hemba kekalvho vrimnivna.

*Yesusva Hevna Andramba Seilva Sihana.
Matiu 4:12-17, Luk 4:14-15*

¹⁴ Wo dawonam Herot kuwul Yonmba buira wolaihasihana, wo nonamba Yesusva Galili provinsram ganamba, di indhanam Sesoana nemelmom besalm isholohmana vinvna. ¹⁵ Os ishunvna, daipotava men lehrava phov, manara noinda Sesoava indhanamba hevtindilm nembaomana vev. Wo noinda osva hengava manam yimba ningvav pevna indkoklamba. Owai, wuleihu, wo honi nemelmomoa kek vithivm, enguvmona vevm.

*Yesus Kekaiv Vena 4Pelara Hevna Aonghal Maha lnindm.
Matiu 4:18-22, Luk 5:1-11*

¹⁶ Doa dawonam Yesusva Galiliplomb pethalmonam gavna, wo di nongalphona Simonim Endruim etel bosalalm. Nomba etel bosalalva

doara tambko andra evelohvna dinasvom so-vawolalm, wo nonamba tambkom pohlalawondana eslevvna. ¹⁷ Wo Yesus unna, daipotangas yimba tambko andrava evev, wo yimba si kamba ehengpetharava, indhanamba yimba si os nembaomana evevra Sesoatindilm. Pohlalawondaoa eplaho, kam ehengpetho. ¹⁸ Wo noinda pohlalawondamba evalahavna, Yesusm ehengpetha, lohmana evevna hetindilm.

¹⁹ Wo Yesusva mendah gavna, tendorini samblam nongalna Yemsim Yonim, Sepetina ombolsamblam. Hev pohlalawondam henga beswonam ehonavna botsra. ²⁰ Wo Yesus unna, yeoa kam ehengpetho katindilm. Wo os evena, aralm, andranindm, himba sandhalaha epihonamba botrini, Yesusm ehengpetha.

Yesus Tihsongom Engvapiangamnana Indhanarinina Nihmerini.

Luk 4:31-37

²¹ Wo wonganamba, Kapaniam kembella wonpho, wo no sapturam sembayangduvra wonsiha. Sapturava Yutanindva vah iaevluwul vevna hevna volm. Doa Yesusva di indhanam Sesoana moam ishomana vinvna. Ishunvnamba, ²² wo indhana hillivnamba, os uvna, pai, doarava katekisva pimba osva moakus unvnamoaa, osva Yesusva memba moakus ovpa. Yesusva nengthal lohv, wo aralna moalamangva kuvuwulluhv. ²³ Wo Yesusva mendah ishunvna, doa mongova indhanariniva sembayangduvra sihana, indhanarinimba nomba tihsongo doara pothomnana, wo

himba daikaka vevna. ²⁴ Wo hev Yesusm mindnam omnana, Yesus, es yimba kamba ata venavav? Doa kava nonora, yimba Sesoanamini prona, besal yimba, wo ata kam humeis ye nihsesowolm venavm.

²⁵ Tihsongomungilva os ishomnana, wo Yesusva tihsongom omnana, wuleihao, wohgao. ²⁶ Doa tihsongova indhanarinimba nomba kusukul vrevna, mindnam kinge os ovna, doa tihsongova nihmeriniva os phona.

²⁷ Wo indhana di sembayangduvra una, pai, mani hevpa manamoja memba? Yesusva besal lohv, wo hena moamba tihsongova hillivpa, wo os vivta. Snamba andrava pivva doarava nunigli namoa, owai. ²⁸ Wo lelnam indkumbi moa wulaindahalv vevna di mongona kembella mongona kembella Galili provinsra.

Yesus Andra Velohma Vevna Hevna Pethara Galili Provinra.

Matiu 8:14-17, Luk 4:38-44

²⁹ Wo Yesusva sembayangdini phonamba, Simonin inam Endrui inam geinnambaa, Yemsim Yonim domangas wongana. ³⁰ Wo Simonna kolalva di doara deuvra uvavulmungil nendawovna, nih vuvremnavna, wo Yesusm ishumne. ³¹ Wo Yesusva deuvra sihanamba, muram ga, doa englaval kleiha vre, wuleihapholm vevna. Wo uvavulva nomba os daipotangas wuleihana, wo ungevliriniva nomba beswonam lohmana vevna, wo innesowa vinvna.

³² Doa simba okilvravnamba, nomba deuvnindva uvavulmungilmaba, tihsongo mungilmaba mindnam nom tungiambv vevna

no deuvram, Yesus di avnam, ³³ wo indkumbi no deuvnindva di kusopra. ³⁴ Wo Yesus vinvna, wo uvavulmungilmiba nomba kanandhawol vevna, manamungil manamungil, wo tihsongova mindnam Yesus engilpingu vinvna no indhanana nihmeriniva. Tihsongova nomba Yesusna doa nonora lovahvna, os Sesoanamini prona, besal lohv. Wo noinda Yesus no tihsongomba ovunna, moamba wuleihu, manam yimba indhanamba osva unvav.

³⁵ Doa sia eunumbullam, mongova indhanamba mendah ninshavna, wo Yesus no deuvrini holopenamba hevho, indhanahuiram ganamba, di sembayang vawovna Sesoam. ³⁶ Wo Simontatana sis engavulanga lingil lihanam, ³⁷ wo Yesusm di yumna vlie, una Yesus, indkumbi yemba aslulangalm vevna, yeoa hem wolapho vera.

³⁸ Wo Yesus unna, owai, honaminiva mongona kembellam kava wongalm vev yemba, no kembella eva kava Sesoana nemelmom isholm geinv, memba kana andrava, hona andram kava pronata. ³⁹ Wo Yesus isholohmana vevna mongona kembella mongona kembella di Galili provinsra. Wo di indakonda sembayangduvra himba indhanam wonamana ovovna, Sesoana nemelmom ishomana vinvna, wo tihsongom engilpingu vinvna indhanana nihmerini.

*Yesus Mongo Lombamungilna Wosavam
Kevrana.*

Matiu 8:1-4, Luk 5:12-16

⁴⁰ Wo di mongova lombamungilva pronamba, Yesusm mulumbandna lovhhoamna, wo himba Yesusm osahmana, kana wosavam kevro, wo

kana nihtov lesvhoara. Ata ye kevravavmi owaimi. ⁴¹ Wo Yesus hem wavra vovhoamnanamba, wo engla holothomnanamba, omnana, tanamolnam ata kava yena wosavam kevravav, yena nihtovoa lesvhoara. ⁴² Wo Yesusva os ishomnavnamba, lombamba lelnam heniminiva selpevna, wo he beswonam pho.

⁴³ Wo Yesus ongawolna, garava, manam yimba indhanamba ishunvav, osva doa Yesus kamba sishona vrei. ⁴⁴ Owai, ambo sembayangna andranindrini inam gao. Garava, innepetaoa guao, os Moses doara ten novol venam. Wo hemoa no innepetaoa vraho, Sesoam nonam okolalm. Wo sembayangna andranindrinvia yemba os ata naengho vrevav, doa lombamba yenamba wohselpei, wo indkumbi si os yemba nonora, yemba doa kanandhana. Doa lelnam gao. ⁴⁵ Heva os owai, himba ganamba, moakus une, wo indhana indkumbi moa wulaindahalv vevna no kembella no kembella, wo noinda Yesusva es eva mongona kembellava sihavta, monamilla kulthoamnavnam, ka nunglivai. Noinda Yesusva monamilla ambo alohvna, wo di indhanamba heindam ambalvohvna, kana kinwondam nembahapiha vinu.

2

Yesus Mongom Monglakoklanam Wolai-haphona.

Matiu 9:1-8, Luk 5:17-26

¹ Wo henga Yesus Kapaniamra phona deuvra. Phonamba, doa indhanamba os hillina, wo noinda hevinda kusona. ² Kusonamba, wo

deuvra kekel vithina, deuvra tuvra monara os kekel vithina. Wo osva Yesusva wonamana vevna, hevna besal nemelmom ishunna.

³ Mendah ishunvna, wo indhanamba ambna, wo tendorinim wulimbna. Tendo samblasambla wulimbna towara. Nomba tendoriniva monglakoklana doara livna os. ⁴ Wulimbnamba, doa Jesusindam wulsaivom vevna, heva os owai, indhanamba kekel vithina. Doa volnamba, wivtam vevla vinamba, doa tendorinim no mella enesna towara piapove. Piapovvnamba, Jesus di deuvmera avnam.

⁵ Wo himba os nongalnamba, wo nengna, hona tendomba kam ningminivna, ata sishona vrevav. Doa noinda himba no tendorinim os omnana, seh, indkoklava yenamba mekava poswol vei. ⁶ Doa monglava katekisva di hiluwuluwuvna, os ningminivna, Yesusva gekala ov, Sesoangas hev indkoklava poswol vinv indhananamba. ⁷ Manam himba osva ov, osva sem Sesoamba opipahav.

⁸ Doa Yesusva hev ambo lihawol vena, katekisva kamba os ningminiv, wo noinda unna, manam yimba kamba osva ningminiv? ⁹⁻¹⁰ Yimba os ningv, kava dasalm oi, kava tendorinim omni, indkoklava yenamba kava poswol vei. Hillu, kava ata henga tendorinimba omnnavav, pho, deuvram gao, wo tendoriniva ata verava, kamba osva ata yimba liheivav, os kava dasalmba oimoa, kava tanamolnam hena indkoklava doa poswol vei. Manara, kava arana ombol lohv, he kamba moamba mendekliva kovorahona, wo noinda kava hona tendorinimba osva omnnav.

Doa himba tendorinimba monglakoklanamba omnana, ¹¹ yeoa phovm, monglana lohvhoao,

vuhesaloa deuvram guao. ¹² Doa tendorini phonamba, vuhesal vranamba, doa wulvoha hevna deuvram no indhanana novra. Wo indkumbi os uvna, pai, pai, es hevpa Sesoava vei. Doa noinda Sesoam okulivna, lehra, doarava kava osva nunglinamoa.

*Yesus Omnana Matium, Yeoa Katindim
Petheinu.
Matiu 9:9-13, Luk 5:27-32*

¹³ Wo Yesusva henga Galiliplomb pethalmonam ga, ganamba, wo indhana mindnam di kusomna. Kusomnavnamba, Yesus wonamana vevna, ishunna hevna nemelmom besalm. ¹⁴ Ishopieinnamba, monam henga ga, Livaim nonglakoho, Livaiva nomba Alviusna ombol, wo himba kantorra mera avna, duangna andrava vawovna, di indhanamba hevna taeksva dembhasuv velvohvna. Doa Yesus phonamba, omnana, pro, kam engpetho katindilm. Doa Livai phonamba, hevna andrava wuleihavna, Yesusm wohengpetha.

¹⁵ Wo venamba, dawonam Livaiva Yesus hetindim inne wonnena. Wo nonamba Yesusva indhanamba mindnam wonnawovna, taeksdi dombnindm, puehlnindm, manara, sna indhanamba mindnam doarava Yesusmba tellohmana vevna.

¹⁶ Wo Yesus wonnevnama, mongova katekisva os nunglul lovahvna, himba os lovahvna Varisinindilm. Doa himba Yesustindim osihinvna, es hevpa Yesusva osva vev, os honam taeksnindm puehlnindm wonnawov? Owai, osva sahoklal. ¹⁷ Wo ona ishune, Yesus hellowole, wo

hev henga olhmona unna, os mantriva uvavul-nindmangas obatva dahwol vaomana vev, besal-nindmba owai. Wo osva kava prov, monglava in-dhanamba ningvra kava indhanakokla, wo kava no indhanamba das owol vev. Wo monglava ind-hanamba ningvra kava besal, wo no indhanamba owai.

Yesus Olhmona Unna, Kana Moamba Nemelangas.

Matiu 9:14-17, Luk 5:33-39

¹⁸ Doa Yon Baptaistatana monglava Varisinind, honi indhana innemba lovahavna, os ningvna, sembayangna wevska os kava engiv. Doa mongova indhanamba Yesusm osihminivna, os Yontatanamba, katekisva innemba lovahavna, heva os yena hellelnindva osva lovahavnamoa, manara? ¹⁹ Doa Yesus henga olhmona unna, tendoriniva ongamba vravrava, hetindiva uvav, lehra vrav, wo owai, innemba nonamba lovahavavmoa, beswonam hlawuvav. ²⁰ Kava mendah hui hona pethara lohvna, katindiva innemba lovahavnamoa, heva os si kamba ungundva engvapingivav, wo osva katindiva kamba und vewuvav, wo noinda innemba si lovahavav kanasirava.

²¹ Doa Yesusva mongo olhmona unna, os hillu, deuvpa nemelva yimba dimbrirava, deuvtva manam yimba kololva dumbvav. Yimba osva virava, deuvpa lelnam pilpevav. ²² Wo manam yimba kolakoklarava kovav yesva, nemella ko. Kolakoklava ata humeis powalvm, wo yesva shara vetvaral vevav. Kana moamba yessowamsna, wo katekisnamba wevsava

kolakoklamsna, wo mongawulmba elohvmoa, owai, ata powalvav.

Yesus Unna, Kava Nengthal Lohv, Osm Indhanam Kava Ishunvra Mani Vivav Sapturava.

Matiu 12:1-8, Luk 6:1-5

23 Wo sapturava Yesusva hev wonga osohovmonam, wo ponda angavna, wo hev innepeta momnanam dombolangavna, hilluwul angavna. **24** Wo Varisinindva di lovahvna, nongalvhvna, hev Yesusm kueisvina, yetindiva esm detiva sapturava viv. Osva himba witmovpa englanamba temba nenoх vowel vivpa. Kava ui, andra viv sapturava, wo Sesoana moamba himba osva sahokla vriiv.

25 Wo Yesus hev ona, owai, yimba doa tombaira nunglina, wo doa yimba nonora, nemetva Devitva simbehumunilliniva os vena. Heva os yimba mendah plalmba tit viv. **26** Ponmba vinvnamba, doa Devitva sembayangduvra siha, roti noi ne, ten Sesoana novra nalohvnam, nomba rotiva os uvna, manam ombandhanamba hlavav, hev noi sembayang andranindangas hlav. Heva os Devitva vena nemetva, doa he moang vinnata rotiva. Nonam vena, Apiatar nonamba sembayang andranindna kuwulva wulluhunvna.

Yimba nonora, Devit sembayangduvna wevsamba osva engvnamoa, heva os yimba memba kamba kueisvivna, yimba saptuna wevsava engivmoa. Manara noinda yimba mendah levrapivolvmoa, Sesoava os nengvna, wo tomonalmba indthueinna saptuna wevsam, sembayangduvna wevsam. **27** Sesoava seilva indhanam vowel vena, wo dawonam unna, detioa

sapturaoa vah iaevulo. Himba nengnamoa, osva indhanamba pueilmera kava wolasihha vevav, owai, himba kolvwrowolalm beswonam vevna. ²⁸ Kava arana ombol lohv, osm kav indhanam kava ishunvra, mani ata detiva vivav sapturava.

3

Sapturava Yesus Englakoklanam Sishona Vrena.

Matiu 12:9-14, Luk 6:6-11

¹ Wo sapturava Yesusva henga sembayang-duvra sihanamba, pai, indhanariniva englakoklanamba men av. ² Wo Varisinind di muskonam nunglul aevulvna, ata Yesusva es vevav, ata englakoklanamba sishona vrevavmi? Wo pi nunglirava, ishulanga, Yesusva sapturava andra vei, Mosesna moamba himba pilpiakohai. ³ Doa Yesusva englakoklanamba omnana, phorava, hui mura lohvhoao indhanana novra. ⁴ Doa nom Varisinindm sah owol ve, es hevpa Mosesna pina tomonalnamba moamba es novol velohv? Detiva sapturava kava beswonam vevmi, ora kava sahonam vev? Kava hona indhanarinimba sishona vrevavmi, ora kava nombalvhoavav? Wo Varisinindva moanghui aevulvna.

⁵ Doa Yesus hem muskonam nungsis vungo, duus vevna, yimba undva sahoklal, yimba wavra vovhueimnivmoa hona englamungilmba. Doa Yesus omnana, englaoa yeoa shuavm, wo shuanamba, doa beswonam wohlohmanavna. ⁶ Wo noinda nomba Varisinindva pulvonamba, anga, Herot kuwultatanam ishulanginna. Kusonamba,

hev poaita unna, es hevpa pimba Yesusva si vinvav? Doa hev una, si helvakomandhivav. Hena monana pimba si helvakomandhivav?

*Jesusva Uvavulmungilmба Mindnam Sishona
Vewol Vena.*

Luk 6:17-19

7-10 Ungundva osva poaitava uvnamba, wo noinda Yesus hevtindim wonga, Galiliplombra wonpho, wo indhanamba mindnam kusona, doa Yesus wolapho vevna. Galili provinsnind kusona, wo eva oklanind mindnam, ten doara hillinamba, Yesus os mendekliandra vev.

Os Yutia provinsnind, Yerusalem kotanind, Itumeaind, Yotanpora hilnind, Tair kotanind, Saiton kotanind, indkumbi noi engalla kekel vithie, ambo Yesusm lukul vruwul vevna, os ningvna, Yesusm ka ambo tuhivrava, ata kamba lesvhoawol vevav. Wo Yesusva hevtindim unna, ata humeis kamba singtheivav, bot vreu, ata kava botra vongarava, avhoa posra. **11** Wo nomba tihsongomungilva Yesusm nunglivnamba, doa pethara dalvna Yesusina, os Yesusm mindnam umnivnamba, yimba Sesoana ombol. **12** Doa Yesusva no tihsongom ongowolna, manam yimba kamba osva muserava sevravriv, yimba he.

*Jesusva Hevna Moalamangnindm 12Pelara
Pusvund Vena.*

Matiu 10:1-4, Luk 6:12-16

13 Doa Yesusva Galilipundrini indhanahuiram vonganamba, hevtindiva sis engvolnamba, Yesusna moara. **14** Doa lumbulla kusonamba, Yesusva tendomba 12pelara pusvund vena nominiva, unna, yimba kana moalamangnind

lovahv, yemba kava boasna wonamana vevav, doa si kava yem wolanga vevav, kana moam ishuvmona velm. ¹⁵ Wo yemba kava si os poauothowol vevav, wo noinda tihsongomungilmaba yimba si beswonam wolapulvo vewuvmona vevra. ¹⁶ Doa boasna Simonm pusvundthoanamba, awona, yimba Pita lohv.

¹⁷ Yemsm Yonm etel bosalalm Sepetina ombolsamblam pusvundthoawolna, awowolna, yimba holaiklana ombolsambla, doara yimba indvuvral elohvna. ¹⁸ Wo mongom himba pusvund vena, Endrum, Pilipm, Bartolomium, Matium, Tomasm, Yemsm temba Alviusna ombol, wo eva Tatiusm. Wo Simonmba himba pusvundthoana, Simonmba nomba indva wulluhvna, os Romduangmoa engilpingilvohara pivna Yutanindna petharinioa. ¹⁹ Wo Yutas Iskariotm pusvundthoana, noi Yesustindilm dawonam lohvna, wo sewonamba henoi si Yesusva ungundna englisrava desvhueinvav.

*Katekisva Yesusm Umnina, Yimba Sahoklal,
Yimba Setanna Andra Vev.*

Matiu 12:24-32, Luk 11:14-23 eva 12:10

²⁰ Doa Yesustatana deuvram anga, wo henga kembelnind mindnam ksunna, Yesusna moam ka hillivai, wo noinda Yesustatanava innemba hlahuiva vevna. ²¹ Wo moamba prona, wo Yesusna aval boasalal himba os hillina hevindava, os hevm ishunna, Yesusva innemba nehui vev, dihi daikaka ov?. Wo noinda Yesusindam hevnamin anga, waiembalm henga.

²² Doa mongla katekis Yerusalemrini holvoral vena, wo ishuvmona vevna, os unna, tihsongona

kuwul Setan sihamnavpa, wo Yesusva nonapopol andra vev, tihsongomba wolanga vev. ²³ Wo Yesus hev hellenamba, indhanam unna, ambtok. Ambanamba, henga Yesus olhmona unna, os katekisva nomba unna, tihsongona kuwul Setan kam sihamnavpa, wo henapol kava noinda tihsongova wolanga vaomana vinv indhanana nihmeriniva. Osva owai, owamba kava wolanga vetava, beswonamba kava aevulvavmoa, indkokla vilovav. ²⁴ Hev unna, mongona pethanindva avra, wo daos oho hevm, wo heva os muhavav, avavmoa. ²⁵ Wo mongawa kembelnind avra, wo daos oho hevm, wo heva os muhavav, avavmoa.

²⁶ Wo Setanmba hevna owalmba wolanga vetava, beswonamba aevulvavmoa, indkokla vilovav. ²⁷ Himba kam sihamnavmoa, owai, kava doa Setanmba wena ningena, wo noinda hena andrava kava sahokla vringu venav, hena tihsongova kava wolanga vaomana vev.

²⁸ Doa tanam kava yem ishunv, indhanamba indkoklava vivra, wo Sesoana nihilva sahokla ovrivra, nomba hena indkoklava Sesoava si poswol vewol vinvra. ²⁹ Heva os indhanamba Sesoa-songolmba sahokla ovrivra, nomba poswol vinvramoa, hena indkoklava si wohluhunvra.

Yesusva noinda osva unna, manara noinda himba Sesoa-songolnapopol andra vaomana vevna, heva os katekismba nomba Sesoa-songolmba sahokla ovrivna, ³⁰ himba gekala uvna, Yesusva Setannapol andra vaomana vev.

*Yesusva Unna, Anmund Kana Owalva Lovahv?
Matiu 12:46-50, Luk 8:19-21*

³¹ Wo Yesusva mendah deuvmera avna, indhanam mindnam wonavna, wo hevna avalna boasalalna muram ambra, ambanamba, ambara lovahmanavna, wo unna, Yesus photok. ³² Wo mongova indhanamba hilwulnamba, noi ten deuvmera kusovnam, doa Yesusm umne, nongaltok, ten avapevtatanamba yenamba amballa lovahv, yem umniv, photok.

³³⁻³⁵ Doa Yesus unna, an kana owalva eva lovahv? Himba nomba Sesoana moamba hillivpa, wo enguvmona vevpa, himba nomba kana avalmsna, kana boasalalmsna kana muskovolmsna. Wo Yesus nungsis vungo indhanam ten kusonam, unna, memba yimba eva aevulvpa, kana avalmsna kana boasalalmsnata.

4

*Yesus Olhmona Unna, Monglava Indhanamba
Sesoana Moamba Kek Vithiv, Monglava Owai.*

Matiu 13:1-9, Luk 8:4-8

¹ Wo Yesusva Galili plombpethalla henga indhanam ishomana vinvna di. Wo indhana mindnam henga di kusopramna, engalla kekel vethapra, wo noinda Yesusva botra vonganamba, avhoa. Avhoanamba, nominiva kihhe, wo indhanamba engalla kusona, ² wo Yesusva hevm ishomana vinvna, olhmona unvna os, ³ yeoa hillivm. Mongova indhanariniva osoram gavna, witmovm kokovelm gavna. ⁴ Himba nomba koko vengavnamba, monglava monara poksra dalvna, wo tuawa ambna, hlapia.

⁵ Wo monglava dalvna di pethara, nomba pethava honsra ambo dasalm lohvna, wo noinda

lelnam phovna,⁶ wo okombava suwelva lovhoav-namba, witva nomba soulawol vevna, plalva pip-ihha vevnamoa.

⁷ Wo monglava witmovpa pethara dalvna, no pethava ilsasva mera lohvna, wo nomba il wu-nithavna, wo nihilva endvnamoa. ⁸ Wo monglava witmovpa petha besallava dalvnamba, wo nomba beswonam phovna, wo nihilva mindnam end-vna. Mongova 30pelara endvna mongawatillava, wo mongova 60pelara endvna mongawatillava, wo mongova 100pelara endvna mongawatillava. ⁹ Honi olhmoa kanamba yimba hillivra, heva os aongoa keknam elepewolvra.

Yesusva Manaram Olhmomba Ishona?

Matiu 13:10-17, Luk 8:9-10

¹⁰ Doa nomba indkumbiva bukethavnamba, doa hevho Yesusm sahminie, no 12pelara indhana, nom hev ten pusvund venam, eva mongla ombandhana, noi Yesusm engvulvahmana vevnam. Hev Yesusm sahminie, es hevpa honamba yenamba olhmonamba plalva lohv? ¹¹ Wo Yesus henga unna, plalmomba doarava poaita lohvna, men daipotangas ka yemba moakus unv, os Sesoa daipotava hevtindimba nembaomana vev, os yeoa pevna sahaposwomoa maivithivm. Heva os nomba indhanamba temba bukethavpa, himba Sesoamba undnahonamba ningminivmoa, noinda kava moakus unimoa, kava olhmonangas uni.

¹² Doara mongo Sesoana moashulnindriniva nonora avna, ona, si os phovav sewonamba, wo os novol vena,

Indhanamba si hiluvmona verava, si nunぐ
vmona vevra, heva os owai, si beswon
amba nunglivavmoa, si beswonamba lev
rapivolvavmoa, si humeis himba hevna in
dkoklamba wuleihivm, wo Sesoava hena
indkoklamba poswol vinvra. *Aisaia 6:9-10*

Wo Yesus henga unna, moamba honamba doa
yimba tombaira nunglina, wo daipotava ind
hanamba hona moamba wohengiv.

*Yesusva Hevtindim Plalmom Ishunvna.
Matiu 13:18-23, Luk 8:11-15*

13 Doa Yesus unna, yimba kamba umni, olh
momba yenamba kava tit viv. Doa es eva yimba
mongova kanamba olhmomba si beswonamba
levrapivolvav? **14** Wo hillu, yemba kava men plal
momba ishunv, indhanariniva nomba witmovm
osora koko vengavna, wo plalmomba honanamba
os lohv, mongo indhanariniva Sesoana moamba
ishomana vinv. **15** Wo witmovpa monglava
monara dalna poksra, wo tuawa hlapia. Wo
plalmomba honanamba os lohv, mongova ind
hanamba Sesoana moamba hillivnamba, wo Se
tan hev lelnam provpa, wo maikumi vewol ve, wo
noinda himba Sesoana moamba maivithie.

16 Wo witmovpa monglava pethara koko ve
namba, no pethava honsra dasalm lohv, wo
plalmomba honanamba os lohv, mongova in
dhanamba Sesoana moamba hillivnamba, lel
nam indk vithivna, **17** heva os moamba kek
vithivnamoa, ambo sesmomowanam kleihalo
hvna, wo dawonam mongo sahoklava nonglapho
tava, mongova indhanamba hemba os nungeil
vrava, doa Sesoana moamba hilliv, wo noinda

sahokla vri, wo noinda himba Sesoana moamba undsasa vrivav.

¹⁸ Wo witmovpa monglava pethara dalna, no pethava ilsasva mera lohvna, wo plalmomba honanamba os lohv, mongova indhanamba Sesoana moamba hillivnamba, ¹⁹ wo sismba himba hevna petharamba nengeuvmona vevna andramba, wo os ningvna, heva kava diandra vivav, wohtowond lovahe, wo nomba nengavnangva ilmsna wunithavna, wo himba Sesoana moamba engivamoa. ²⁰ Wo witmovpa monglava petha besalla dalna, wo plalmomba honanamba os lohv, mongova indhanamba Sesoana moamba hillivna, wohkek vithivna, wo himba Sesoana andrava vewuvmona vevna, wo hena andrava inne nihilmsna endungu vinvna, monglava 30pelara, monglava 60pelara, monglava 100pelara.

Yesus Olhmona Unna, Katindiva Woklamsna Lovahv.

Luk 8:16-18

²¹⁻²² Wo Yesus henga unna, mana emamba daipotava komandhul avrava, si ambarangas dembrivav, wo mana emamba daipotava ehlatha wulaevrava, si musera viliheivav. Doa noinda yimba wokla lavvrivrava, yimba manam tekillava komandhivav. Owai osva, ambara lavraholothu, wo noinda indhanamba beswonam nokambara novvivra. ²³ Himba nomba kana moamba beswonamba hiluvmona velm vevrava, heva os aongoa keknam elepewolvra.

²⁴ Moamoa kanaoa yeoa hillivm, kek vithivm. Wo yimba indhanamba es hevpa lesvhoawol velm vivrava, ora mindnam, ora espeta, Sesoah heva hev yemba nongalvav, wo hev yemba

lesvhoawol vevav, ora snal. ²⁵ Heva os yeoa aongoa lelahapravm, wo himba nomba moamba kanamba hiluwulvahvrava, Sesoava hemba os mongmomba mumushhoa vrinvav, wo himba nomba moamba kanamba espetambo hiluwulvahvrava, Sesoava moamba nomba si wohposwol vinvav.

*Yesus Olhmona Unna, Sesoana Nemeltindiva
Selva Eskand, Heva Hev Ambo Mindnam Si Phovav.*

²⁶ Wo Yesus unna, katindiva os phov. Mongova indhanarini innemsna osora pethara tekoko vei, ²⁷ wo simba mindnamba andra vungaiva, veiva, nil wulphungu ve, doa indhanarini nomba nengi, es hevpa phoi? ²⁸ Owai, pethanapol phoi, doa nil wulpho, wo si verava, lile, wo nihilva si endvav. ²⁹ Si aembul verava, doa pueite, wenokombo vevavmoa. Doa Sesoana nemeltindiva os phovav.

*Yesus Olhmona Unna, Sesoana Nemeltindiva
Selva Eskand.*

Matiu 13:31-35, Luk 13:18-19

³⁰ Wo Yesus unna, es kava yemba hengava ishunvav, Sesoana nemeltindiva si os mindnam aevulvav, wo es kava yemba hengava olhmona ishunvav noindamba? ³¹ Nengara, Sesoana nemeltindiva mastatkulmsna. Kulva nomba eusikandal, ³² heva os indhanarini kukuvungu verava osora, phorava, innemba kuvhoangu ve, wo klapva mendekli kulvuhanga vevav, doa tuawava lamba di thiwulsihavra wusivilla. Doa Sesoana nemeltindiva si os mindnam aevulvav.

³³ Doa noinda Yesusva olhmongas vena mindnamba, os hev ten ishunnam. Wo indhana

beswonamba hiluwulvahvrava, doa hengava Yesusva nomba ishunvra. ³⁴ Doa olhmongas Yesusva vena, wo hevtindimangas himba plalmomba velokusa vinvna.

*Yesus Vuvim Ovomnana, Wuleiho.
Matiu 8:23-37, Luk 8:22-25*

³⁵ Wo nomba simba kilvravnamba, Yesus hevnam unna, botra pimba ata no plombpethallam angavav. ³⁶ Wo indhana mendah di engalla lovahvna, hevtindi botra aevulthana, te Yesus mendah avnam, wo wonga. Wo monglava indhanamba hevna botsra avhoangana. ³⁷ Wo mendah wongavna, vuvi mendekli vena, wo ombokva mendekli vevna, botrava sihavna, wo botra pilivhoalm vevna, ³⁸ wo Yesusva di omolsis livna, kuva wangtomra holothuwulvna, yihalna olvna. Wo hevtindi dehue, umnina, guru, photok, pimba pilipihalm vev botva, wo ata pimba nepola vilovav, wo yimba kamba ninginvmoa.

³⁹ Doa Yesus pho, vuvim ovomnana, wuleiho, wo ombokm omnana, yeoa eva wuleihota. Doa noinda vuviva wuleihana, wo ombokva eva wuleihanata, wo pomba beswonam livna, wo botva beswonam gavna. ⁴⁰ Doa Yesus henga unna, es hevpa yimba pemba vivna? Yimba osva ningvnamoa, hev kamba wongav, kam beswonam kekalvho vewol vungav. ⁴¹ Wo noinda himba una, pai, es hevpa vei, wo hevm ishue, sumbho, vuviva ombokva hena moamba hillivna, wo wuleihe. Wo noinda pem vivna Yesusnapenamba.

5

Yesus Tihsongom Wolapho Vena Daikakamungilna Nihmerini.

Matiu 8:28-34, Luk 8:26-39

¹ Doa Yesustatanamba nohalm pulvo, Gerasanindna pethara di pulvona. ² Wo botrini wonholopenamba engalla, wo mongova indhanariniva phona. No indhanariniva tihsongomungilva, wo noinda dai omana vevna, ³ wo indhanahuira limana vevna pokamahulsra. Dai omana vevna, wo indhanamba eva es kekel vivta, owai. ⁴ Wenamba englamonglava indhanamba henamba ningewol velvohmanavna, heva os owai. Indhanamba indkumbim eva pingokoho vaomana vevnata, wemba nomba himba bilvhanga vaomana vevna.

⁵ Wo okombanam sinim di pokamahulsra eva olora weingona lohmana ovovna, hevm honsra pusungu vevna aiv. ⁶ Wo himba Yesusm nonglanga venamba, Yesusva ten botra prov, wo Yesus holopenamba, doa daikakamungil lelnam promnanamba, mulumbdandna lohvhoamna Yesusinda murapeta, ⁷ doa Yesusm mindnam omnana, Yesus, yimba Sesoa mendeklina ombol, es ata yimba kamba venavav? Sesoana novra men kava yem ishomnav, manam yimba kamba ata nihsesowolm venavav.

⁸⁻⁹ Doa Yesus tihm omnana, tihva nomba no daikakamungilna nihmera avna, omnana pevm sevro nihil. Wo tih una, Mindnam, manara kava mindnam aevv. Doa Yesus tihm unna, yimba sahoklal vilov, nihmerini pulvo. ¹⁰ Doa daikakamungilva Yesusm mindnam ishomnana,

tihva honamba manam yimba oklava wolanga vevav kanaminiva, owai.

¹¹ Wo monglava deuvmotovpa mura di olopethalla ki hlalvohvna, ¹² wo Yesus no tihm wolanga velm vevna, tihva wenamona una, kamo a wolanga veo, nom deuvmotovm mera saivoe, ¹³ doa Yesus unna, wouta. Doa tihva indhanarinimini pulvonamba, nom deuvmotovra sihangu vena, doa noinda no deuvmotovpa olora vitivhoalla, lomosis peivvna plombram, wo wusprowol venamba, wohdalna. Nomba deuvmotovpa eva notongopetamma, 2000pelara lovahvna.

¹⁴ Doa nomba indhanamba miemba dahwol vinamba, nomba lelnam gapiana, deuvkembelnindm ishulanginna, deuvnindm monanindm. Wo indkumbi nonglalm embanamba, es hevpa vine. ¹⁵ Doa Yesusm nonglapulvona, wo indhanarinim nom nunglina, ten doara dai omana vevnam, wo malona beswonam av, beswonam men nengavnang vawov. Doa noinda indkumbi nunglivnamba, pem vinivna Yesusnapenam. ¹⁶ Wo nomba indhanamba doara miemba dahwol vewuvnamba, noi osva no kembelnindmba ishunna, Yesusva os vini. Yesus daikakamungilmaba wolaihaphona, wo tihsongova henaminiva meinda sihapieinnamba, noinda miemba nomba dalna. ¹⁷ Doa noinda no indhana Yesusm opholihina, ai kanaminioa geinu.

¹⁸ Doa Yesusva nomini botra vongo, wo no indhanarini mura pronamba, ten doara Yesusva selvhoapipahamnanam. Hev ona, Yesus, pioa

engai, yei kava mongawulm ahamana velm vev. ¹⁹ Doa Yesus omnana, owai, deuvram gao, sehpевm os ishongeinu, Sesoava kamba wavra vovhoamni, wo noinda kanamba selvhoapipahai, wo kava beswonam lohv daipotava. ²⁰ Doa himba noinda os vena, ganamba, mongona kembella mongona kembella di Dekapolisnahalm, wo nom ishungeinna, Yesusva kamba doa sishona vrena. Wo nomba indhanamba hillivnamba, os uvna, pai, es hevpa vevna.

Yesusva Nengthal Lohvna, Osm Uvavulmungilm, Indhanamindilm Wolapho Velm.

Matiu 9:18-26, Luk 8:40-56

²¹ Doa Yesustatana nomini botra wongavna, henga mongnahalm wonpho, wo Yesus botrini petharam holopenamba, engalla lohvna, wo indhana mindnam di Yesusinda kusoprana. ²² Wo mongo tendorini pronamba, no tendoriniva mendekli lohvna Yutanindna sembayangnindna, nihilva Yairus. Pronamba, Yesusm pethara lithamnavna novlomossis, ²³ osm vevna, Yesusm mindnam osahmanavna, omnana, momba kanamba doa indnakra vev. Pro, engla holothomno, ata noinda uvavulva wuleihavav, wo ata beswonam avav. Tahonmba henamba 12pelara lohmanana. ²⁴ Wo Yesusva pethamna, wo ombandhanamba mindnam eva mongawulm gapiavna, mi sis nihanasis sihanasis.

²⁵ Wo Yesusi Yairusi mendah monam engavna, mongova ungevlirini mura provna, nomba ungevlirinimba wosepul kovhoavna, tahonmba 12pelara vena. ²⁶ Wo no ungevliriniva diva doarava aiwo vohavna obatrava

mantrimba, esvemawus esvema tahan himba dembrahowovna obatramba, heva os demutrava wuleihavnamoa, ambo nilhva hevnamba aiv wohgavna. ²⁷⁻²⁸ Wo no ungevliriniva doara hellenamba, Yesusva os andra vev, doa nengvna, ambo ata eva kava Yesusna malom tuhrava, wo kamba kanandhavav. Wo Yesusva mendah monam gavna, ombandhanamba pelkleihamnavna, doa no ungevliriniva sis pethamna, Yesusna malom tuhmana englana, ²⁹ wo tovolva wohkik vena, wo hevm nonglana, kamba doa kanandhai.

³⁰ Doa Yesusva nungi lilnam os nengvna, an kana meissisongolpetava kenga vrei, wo meis-sis umharavhoa, ona, an kanamba malova tuhi? ³¹ Wo hevtindi umnina, snallava esm yimba owol vev? Pev nongalo, indhanamba mindnam maim ambo alalapat vev. ³² Wo Yesusva mendah ona novvungu vena, an kamba tuhi?

³³ Wo ungevliriniva nomba pem eisungu vevna, wo Yesusinda muram prona, mulumbdandna lohvhoa, doa Yesusm moakus omana, kamba wosepul kovhoaomana vevnamba, noinda yemba kava tuhi. ³⁴ Wo Yesus omnana, yimba os nengi, Yesus kanamba ata selvhoapipahavav, wo noinda yimba kamba tuhi, wo noinda yimba beswonam av. Doa beswonam gao, doa yenamba kik vei tovolva.

³⁵ Yesus mendah no ungevlirinim ishomnavna, wo monglava indhana Yairusna deuvrini ambanamba, Yairusm umnina, doa mopevmba dahai, manam yimba ombamba Yesusm waiproavav. ³⁶ Doa Yesusva hena moamba

hillinna, doa Yairusm omnana, manam yimba duus vevav honindava, ambo kam keknam nengmanavm. Ata kava yemba beswonam vemnavav. ³⁷ Wo Yesus ongowolna, manam indkumbiva yimba prapiavav, Pita Yems Yon yengas ambo. Yemsi Yoni etel boasalal.

³⁸ Wo wonganamba, Yairusna deuvra wonpho. Doa Yesus os nongalna, indhana mindnam di wuo ovna. ³⁹ Wo deuvra siha, os unna, manam hevpa yimba wuo ov? Momba honamba dahaimoa, ambo dawonam ninliv. ⁴⁰ Himba olhmona ishun-vna, wo no indhana los umnina, gekala ov, doa wohdahai, ata hengava snamba es phovav? Wo Yesus nomba indhanamba engalungu ve, unna, phopiao. Wo araravalm Yemsm Yonm Pitam honamangas hevho wonsiha no deuvrava, otolm ten vindilvnam.

⁴¹ Doa Yesus nom otolmindilm englaval okivra, hevna moana omnana, talita kum, osm omnavna, mo pho. ⁴² Doa no mutundisrinimba mindilva henga phona, beswonam lohmana vena. Doa no indhanamba deuvmera di nun glutithueivnamba, os uvna, pai, pai, es hevpa vei? ⁴³ Wo Yesus araravalm unna, inne endaho, wo manam yimba ishuvmona vinvav indhanamba, osva Yesusva os vena, aembu.

6

*Yesusna Owalva Hembä Vreipra Vrivna
Muskonam.
Matiu 13:53-58, Luk 4:16-30*

¹ Wo Yesus nomini ganamba, hevna kembellam Nasaret kembellam gana. Wo hevtindiva sis engpithina. ² Wo sapturava Yesus sembayangduvra siha di hevna kembella, wo indhana di kusovna, wo Yesus di wonamana vevna, Sesoana moamba ishomana vinvna, doa indkumbi umnina, pai, nonorangas lohv. ³ Himba ambo andranindrini lohvna, Mariana ombol, wo hena boasalalva lovahv, Yems, Yosep, Yutas, Simon, wo eva muskovolva men euvmonav. An dihi hemba ishomnana, wo himba noinda nonorava lohv? An dihi hemba omnana, wo noinda himba mendekliandrava vaomana vev, indhanamba wolapho vaomana vev? Doa noinda duus vimnivna, moamba hillimnivnamoa.

⁴ Wo Yesusva hena moamba nonora, doa hem olhmona ishunna, os mongova Sesoana moashulnindrini oklamba garava, wo Sesoana moam dim ishomana vinvra no okla kembelnindm, himba os umnivav, nonorangas lohv, moamoa hillimni. Doa no moashulnindrini henga he vindamba prorava, wo Sesoana moamba ora owalmba ishunda, no owalva os umnivav, ombandhana olohv, plohvra.

⁵⁻⁶ Wo nonamba Yesusva os tungundthoawolalm vevna no deuvnindmba hevna owalmba, heva os owai, himba Yesusmba undnahonam lovahthamnavnamoa, wo noinda es eva tungundthoawol vevav ombamba, owai. Uvavulnindm eskand ambo himba hevnaenglava huhlinvna, wo os momongo wolapho vevna. Himba nengvna, kamba undnahonam lovahthamnavmoa.

Wo Nasaretnindva owalva os vina, wo Yesus hev mongona kembella mongona kembella

os lohmana vevna, Sesoana nemelmom
ishollohmana vinvna.

*Jesusva Hevna Aonghal Mahalnindm Wolanga
Vena, Andra Velm.*

Matiu 10:5-15, Luk 9:1-6

⁷ Doa himba hevna hellelnindm 12pelaram unna, hom kuso, wo kusonamba, unna, yem ka poauothowol vei, wo noinda yimba angarava, yimba si os tihsongova indhanaminiva wolapho vaomana vinvav, yem ka poauothowol vei.
⁸ Innemba manam yimba iangavav, innemba, innewondava, diva mindnam. ⁹ Spatuangas vewol viu, kayen vethowol viu mongasal, wo ala pepavu.

¹⁰ Henoi samblindhana engavra, henoi samblindhana engavra, os ango. Anguwul verava, mongona kembellava yimba nomba ephovrava, di mongawaduvra dawonam wohihillohvm, inne enevm, verava, henga yimba mongona kembellamba engavrava. ¹¹ Wo mongona kembelnindva yemba sehmonamba holvorombol owai ovitava, doa nominioa engavra, wo monara pethaslehol spaturini bumb vewol eveo no indhanana novra, osm himba ningvra, kava sahonam viv, hona Sesoana moamba kava aongpa viv.

¹² Doa no 12pelara hellelnindva himba anguwul vena, no kembellam no kembellam anguwul vena, wo kembelnindm woneuvmona vevna, Sesoana nemelmoa besal ishuvmona vinvna. Os ishuvmona vinvna, yeoa sahoklamoa wuleihu.
¹³ Doa himba tihsongova mindnam indhanana nihmerini wolapho vewuvmona vevna, wo

uvavulmungilva himba welna selvowol vaomana vinvna, wo lesvhoawol vi.

Herot Kuwulna Moara Yon Baptaismba Helvakomandhina.

Matiu 4:1-12, Luk 3:19-20 eva 9:7-9

¹⁴ Yesusna hellelnindva os mendekliandra vivna, wo indkumbi hillivna, os uvna, Yesusva os vev. Monglava uvna, Yesusva Yon Baptais, ten doara dahnam, no pokamarini phona hevna nihna, noinda osva mendekliandrava vewol vev. ¹⁵ Doa monglava indhanamba uvna, owai, Yesusva Elaita, Sesoana moashulnindrini, ten doara heva amana vevnam, doa henga beswonam phona. Wo monglava indhanamba uvna, owai, Yesusva mongova Sesoana moashulnindrini, ten doara euvmona venam pina simbehumunilmongo, doa henga beswonam phona.

¹⁶ Wo Herot kuwul hev hellenamba, Yesusva os andra vev, doa hev ona, Yesusva Yon Baptais, ten doara kav wohtvnam, wo kuwul koyheimninam buimera. Henga himba pokamarini beswonam phona hevna nihna.

¹⁷⁻¹⁸ Wo honamba Herotna moana, plalva seilva os lohmanana. Yon Baptaisva mendah beswonam lohvna, he Herotm kuwulm ononglowomana vevna, os doa yimba sahokla vena Sesoana novra, etepevna Pilipna ongalva doa yimba pelvrana. ¹⁹⁻²⁰ Wo no Herotna ongal Herotias doa himba wuspromnavna, Yonm helvakomandhalm vevna. Heva os owai, Herotva monglam hevna valgonindm unna, angarava, Yonm buiram waiango, wena ningu. Herotva os nengvna,

Yonmba Sesoana andranindrini besal lohv, wo himba Yonmba beswonam buirangas dawonam dahowovna. Doa himba sambla und verombvna Yonna Sesoamom. Hev indnahonam hellellohvna, doa heva os himba hevmba duus velohvna Sesoanapenam.

²¹ Doa sism alowoh vethana, wo Yonmba helvakomandhalva, Herotiasva vevnamba, seilva os vena. Mendah Yonmba buira livna, wo Herot inne indkumbim dahwol vevna. Nomba innemba nom ona hlavna, ten aval hevm nonam lengnam. Wo nonamba kuwulm nembaomana vena, valgonindna kuwulm, hevna andranindna kuwulm, wo deuvkembelnindna mendeklim no Galili provinsnindnam. ²² Doa Herotiasna mol pronamba, sangalna oindalohvna no indkumbi kuwulna novra, wo os una, pai, besal hevm. Wo Herot beswonam avna, no mutundisrinim omnana, doa yimba beswonam oindalohi, yemba kava ata mana emamba vraohvav. Pev orava, mani ata yemba kava vraohvav? ²³ Kava gekalava ovmoa, yemba kava tanamolnam omnnav Sesoana novra, mani mani mani yemba kava os dembrahowovav, eva mana emamba mendekliva yemba kava vrahangas vevra.

²⁴ Wo mutundisrini nomba avalm Herotiasm sehgavna, os manam kava ata Herotmba omnnavav, kam doa omni, pev orava, mani ata yemba kava vraohvav? Doa Herotias omnana, os ishomno, Yon Baptaisna kuwul kovhoao. ²⁵ Wo nungi lelnam mutundisriniva ganamba, Herotm ishomnana, kava osm ov, Yon Baptaisna kuwuloa kuvulambo pirinda, ka nonglalm vev daipotangas.

²⁶ Herot hellenamba, duus vevna, heva os hev

doa musera omni mutundisrinim, es hengava eva kava ovovav. ²⁷ Wo lelnam hevna valgonindrini wuleihanganamba, Yonna kuwul kovhoaka di buimera. Venamba, henga prona, ²⁸ Yonna kuwul pirinda kovopethana, mutundisrinim vraohna, wo mutundisrini avalinam kuvunga, nethamna. ²⁹ Doa Yonna hellelnindva buiduvram anganamba, Yonna nihil vindilhalvonamba, singvi. Doa honamba plalmomba os lohv, Yonmba helvakomandhivnamba.

Yesus Inne Pavmong Vinna, Osm Mindnam Phona, Wo Os Dahwol Vena Indhanam 5000Pelaram Indpetamma.

Matiu 14:13-21, Luk 9:10-17, Yon 6:1-13

³⁰ Wo Yesusna hellelnindva 12pelarava mendah anguwul vevna andram. Vevnamba, henga Yesusindam kusopho ve, wo Yesusm moa ishumnina, hev ten indhanam Sesoamoa ishuvmona vinvnam, selvhoapiha vaomana vinvnam kinwondam. ³¹ Wo nonamba indhana mindnam Yesusindam kusonamba, osm honi pim tungundthoawol ve, wo noinda innemba Yesustatana indwonamba hlalvohvnamoa. Doa Yesus hevtindim unna, pioa dem angai indhanahuiram, wo dawonam di eha vawovav. ³² Wo noinda botra wonvongo, dem wonga, hev ten wonishonam. ³³ Wo mendah pomonam angavna, indhana mindnam no kembelnind no kembelnind di engalla luhungu vevnam, nongalvohvna, ona ten wongav. Wo noinda hesna engalmonam lelnam gapia, dom Yesus ten wongavnam.

³⁴ Wo Yesusva di botrini wonholopevna, nomba indhanamba di doara ksulvna. Wo

Yesusva nongalvna, nengvna, os wavro, hona indhanamba sipsipmsna aevulv, no sipsipmba aralva dahwol vevmoa beswonamba. Sahonam aevulv, wo noinda kamba telohmana vev, Sesoana moam hillilm. Wo noinda Yesusva hem wonamana vevna, Sesoana nemelmomba ishomana vinvna mindnam. ³⁵ Wo okombava vohavnamba, hevtindi Yesusm ishumnina, huiva innemba nalohvmoa, wo si ata kilrvavav, ³⁶ no indhanamoa wolanga veo, wo mongo kembellam dom angara, wo innem di sovawol vira hevm.

³⁷ Doa Yesus hev unna, pev hemoainneoa dahwol viu. Wo hevtindi una, pai, diva esvemava henika kava dumbvav, wo nona innemba sovawol virava, wo hona indhanamba dahwol vi, owai. ³⁸ Wo henga Yesus sah owl ve, es yimba innemba pivnamba temba ieivv, nungsis vituk. Doa nunglinamba, henga una, rotiva pinamba limara aiv nunguluhunv, vei tambkova sambla. ³⁹ Wo Yesus unna, indhanamunu avhoaprara pethara smosra. Monglaoa indanam aevulthavra, monglaoa indanam aevulthavra.

⁴⁰ Wo noinda aevulthanamba, monglava 100pelara, monglava 50pelara, os avhoangu vevna, mindnam. ⁴¹ Doa Yesus no roti tambko dombnamba, wo nov vevongovna, wo Sesoam sembayang venavna, yimba besal, lehra yimba vei. Venamba, rotiva popowol vinna hevna hellelnindm, unna, moang vinu indhanam. Doa tambkova eva os venata, indkumbim moang vinna. ⁴²⁻⁴⁴ Doa indkumbi hlanamba, emba pilivhoangu vinna. No tendomba temba Yesusva dahwol venamba eva indpetamma 5000pelara, wo eva ungevlitundism es eva sevel viv? Doa

hev os vina, hlawol loh venamba, eunumbulva pinge. Wo Yesus unna hevna hellelnindm, eunumbuloa henga nooa dembunu. Doa 12pelara wondamba nomba innemungilva nunguwul vina, pilivhoawol vi.

*Yesus Plombsra Monglana Gavna.
Matiu 14:22-33, Yon 6:16-21*

⁴⁵ Wo Yesus hevtindim unna, yeoa botra von-gopiao, nohalm plombnahalm yesna ango, Bet-saita kembellam ango. Unnamba, ⁴⁶ doa no kembelnindm unna, pevna deuvram beswonam anguwul veo. Venamba, hevpa hevhova lum-bullam indhanahuiram vonganamba, di Sesoam sembayang vaomanavna.

⁴⁷ Doa si kilvravnamba, hevtindiva mendah plombhovmonam angavna, botva wulangavna, ⁴⁸ wo hev nongalga velohvna, vuvikoklara botva sahavrevna, angalmba. Doa si indulnam Yesus sis englgavna, plombsra monglana ambo gavna. Murava nongalphovnamba, kuelwolalm vevna, ⁴⁹⁻⁵⁰ hevtindi di onunglina, sumbho temba provmi, wo pem mindnam daikaka ovuvna. Wo lelnam Yesus ovunna, manapenam yimba uv, memba ka prov, indwonam aevu. ⁵¹ Wo himba botra engalvungo, doa noinda vuvi wuleihavnamba. Wo henga nengavnang vewuvna, pai, es hevpa osva vev? ⁵² Tit vivna, himba Yesusmba levrapivolvnamo. Yesusva no rotiva tambkova espetava hena novra pavmong vinna, osm mindnam phona, heva os owai, mendah himba levrapivolvnamo Yesusmba, ora snal lohv.

*Jesusva Uvavulmungilmaba Mindnam Sishona
Vewol Vena.*

Matiu 14:34-36

⁵³ Doa plombmonam os wongavna, pethara pulvonamba, Genesaret pethara pulvona, wo botva engalla viliheivna, ⁵⁴ wo botriniva wonvenamba, wo indhanamba no kembelnindva di nunglutithueina, os Jesusva hevpa teprov, ⁵⁵ doa lelnam kembellam anguwul venamba, uvavulmungilm towara aiemb vevna Yesusindam. Doa Jesus mongona kembella mongona kembella os lohmana vevna no pethara. Wo indhana uvna, Jesus no kembellam doa gai, wo indhana hillivna, wo uvavulmungilmaba os no kembellam tungiangavna. ⁵⁶ Jesusva os lohmana vevna kembella, kota mendeklira, wo indhana uvavulmungilmaba towara aiemb vevna museram monaram. Wo Jesus mura gavna, no uvavulmungilva Yesusm os ihminivna, ambo ka yena kayenmulm ambo tuhi, doa himba nomba tuhvnama, himba nomba lesvhoawol vevna.

7

*Jesus Unna, Sesoana Moa Simbelnamba
Moamba Wohkuvhoawol Vev.*

Matiu 15:1-9

¹⁻⁴ Wo Varisinind, katekis Yerusalemrini ambanamba, Jesusina kusona. Nonindva himba simbehumunilna moamba wulaevvna, wo mindnam ninginvna, os uvna, innemba yimba manam hlavav, yimbaenglava poswol vehui vivrava mindnamba. Maketrava yimba sovawol vevrava, wo hengava yimba deuvramba iprovrrava, boasna mindnam pora dalohavrava, inneoa os nevm.

Wo mongona moamba os una, mokoa pirinioa sospanoa no innesowarinioa mindnam poswol vivm. Wo eva pevna ninvhomoa poswol vivm. Wo hona simbehumunnamba wevsava henamba os luhunvna mindnam, wo Yutanindva mindnam engivna os.

⁵ Doa no indhanamba Yesusm nonglapulvo, wo os ishumnina, yetatanamba osva vivmoa, kava memba vivpa, himbaenglava poswol vivmoa mindnamba, owai, innemba ambo nis hlav, wo noinda pivna simbehumunna wevsava maisasa vriv. Es hevpa himba osva viv? Sahokla viv Sesoana novrava. ⁶ Doa Yesus hev unna, yimba gekala uv, yimba sambla indna vilov. Yimba simbehumunna moamba vriv, os yimba uv, kava Sesoana moamba memba vriv. Heva os owai, undnahonamba yimba Sesoamba lovahthamnavmoa. Tanam Aisaia doara novol vena yena wevsanamba, wo os he novol vena,

Sesoa osva ona, hona indhanamba kamba okuliv moana, heva os owai, undnahonamba kamba lovahthamnavmoa. ⁷ Himba ombam kamba ambo dasalm sembayang viniv, himba simbehumunilna wevsana vivna, himba uvna, memba Sesoana wevsana pimba viv, heva os owai. *Aisaia 29:13*

⁸ Doa Yesus henga unna, Sesoana moamba yimba ahnam piengiv, wo simbepevna moa wulaevv.

⁹ Yimba os ningv, beswonam kava viv, heva os owai, sahoklal. Yimba osva viv, yimba Sesoana moamba wuleihiv, simbehumunna wulaevv. ¹⁰ Moses doara Sesoana moamba novol vena os,

Yeo a arapevna moamoa hillinvm, wo nesmos ambo vowel vivm. Mongova yeriniva himba nomba araravalmba tandwolva vevrava, wo yeoa henomoa eva perkarra wonvivm, wo helvakomo wohvivm *Kisim Bek 20:12 eva 21:17*

11 Sesoa os unna, heva os yimba pev indamona ishunv, os beswonam indhanariniva araravalmba ovunvra, yem ka beswonam nesmos vowel velm vev, heva os owai, kava korpanna wevsa vena, wo noinda diva kanamba Sesoamangas nalozmanav, yem kava nesmos vowel vevavmoa nonamba. **12** Yimba indhanamba osva numhowol vivpa, wo eva himba noinda Sesoana moamba ahnam piengiv, araravalmba beswonamba nesmos vowel vivmoa. **13** Simbehumunilna wevsana yimba osva numhowol vivpa, wo noinda indhanamba Sesoana moamba ahnam piengiv. Memba wevsa sahoklal yimba viv, wo mendah sahoklalva mindnam yenamba luhunv snal men.

Yesus Unna, Yena Nengavnangnangas Yimba Indkokla Viv, Innerava Owai.

Matiu 15:10-20

14 Wo Yesus ombandhanam henga unna, indkumbi kusotok, kam hillu, wo pisuvu. **15-16** Yimba os ningvma, kava honatongo innembalhvavrava, wo noinda kana indkoklava si osva lohvav Sesoana novra? Yimba os ningvma? Owai osva, yimba es eva sahonam vivavma innerava, owai, pevna nengavnangnangas yimba sahoklava viv, wo noinda Sesoana novra yena indkoklava luhunv.

17 Wo Yesustatanamba nominiva wonvenamba, wo mongona deuvra wonsiha. Wo

wonavhoanamba, doa hevtindi umnina, hona moamba plalva es hevpa lohv? ¹⁸ Wo Yesus unna, yimba os tit vivma, ten mongona indhanamba tit vivm? Mendah yimba os ningvma, honatongo innemba kava hlavrava, wo noinda kava sahoklalva lovahvav Sesoana novra? ¹⁹ Owai, innemba yenamba undrava sihavmoa, osmba indkoklal lohmanara, owai, innemba ambo yenamba eramba sihav, doa henga di kakusra. Wo Yesusva himba osva ovunnamoa, mongova innemba manam yimba hlavav, owai, innemba besalangas.

²⁰ Wo henga ishongeinvna, pevna nengavnangna yimba ambo Sesoana novra sahokla viv. ²¹ Nengavnangva sahoklal indhanamba vewuvmona vev, os goariskui viv, yukov viv, indhanam helvakomo viv, ²² muemb viv wohm, ungevlim, moangakala ovriv, kelsombovho viv, tandmoa ishuv, besalmba moamba hillivmoa. ²³ Sesoa hev hona sahoklava nongalv, indhana hevna nengavnangna ambo viv, wo noinda himba sahoklalva lovahv Sesoana novrava.

Ungundongorini Yesusm Undnahonam Nengmanavna.

Matiu 15:21-28

²⁴ Doa Yesusva nominiva wonganamba, wo Tair kotara wonphona. Phonamba, mongona deuvra wonsiha di, os nengvna, manam ombandhana mendalm kusovma, kavtindim kava wonishomana velm vev. Heva os owai, es eva ata wonkithata, indhanana novsra wonamana vevna. ²⁵⁻²⁶ Wo mongova no kembella di avna Ponisia ongoriniva, Yutanindriniwa owai.

Himba Siria petharini, wo hena moamba Grikna moamba. Wo no ungevlirinina mamba molva, tihva doara nonglana. Doa aval hev os hellena, Jesusva di mongona deuvra amana vev, wo hev Yesusindam lelnam ga. Ganamba, Jesusinda di vendapi, osm vevna, Jesusangas mendekliva lohv. Vendapenamba, doa Yesusm osahmana mindnam, kana molnamini tihsongom wolaihangamno.

²⁷ Doa Yesus olhmona ambo dembhamnana, manam kava otolna innemba dembringa vinlavav windemba, osva owai. Boasna kava otolm innemba dahwol vevav, pilivhoawol ve. Osm ovna, boasna kava Yutanindmsna tungundthoawol vepiarava, wo yemba mongnindmba mendah dawonam. ²⁸ Doa himba ona, tanam yimba ovta, heva os monglava windemba inneslehol ambo hlawol vev, noi otol ten pethara dembrapuv vevm lomungillini.

²⁹ Wo Jesusva omnana, lehra yimba osva ovta, wo ye os ishoiva, wo noinda doa kava mopevnamba tihsongova wolaihangai, deuvram mopevindam gao. ³⁰ Doa hev ganamba, molm di nonglaphona, beswonam av, nin ambo liv, wo tihsongova doa wohgamni.

Yesus Mongom Indhanarinim Aonghohal Vewol Venana.

³¹ Wo Yesus nomini Tairrinimba wonga, wo Saitonda wonkohanamba, mongo pethara wonkohanamba, no pethava os ningthiv Dekapolis. Doa Galiliplombra wonpho, ³² wo indhana di waiambna anguminam. Angumina, heva os ishovnamoa beswonam moamba. Waipulvonamba, Yesusm umnina

engla holothomno hona indhanarinim, noinda lesvhoara.

³³ Wo Yesus anguminam dem oklapetam wain-gana indhanahuiram, doa englapundna angoval tuhowolmana. Doa hevna englapundm limbene-namba, doa angumina mindem tuhe. ³⁴ Doa ovm nonglavongo vevnamba, kinda wusprovnamba, os nengvna, kava kavm kinwonda kethav hona anguminindrinina. Doa anguminam hev omnana hevna moana, epata, osm temba omnavna, mengna aongnaoa yeñaoa pasapo vera.

³⁵ Osoa venana, wo beswonam helwolvna, wo mindemba henga kikih promnana, moa beswonam ishovna. ³⁶ Doa Yesusva indkumbim ongowole, manam yimba osva ishuwul anguwul vevav, os Yesusva vei, owai. Heva os owai, moamba os wulvahmana vena, wo Yesusva eva mindnam ongowolvna, indhanamba henga mindnam ishuwul anguwul vevna. ³⁷ Wo indkumbi no moamba hillivnamba, una, pai, besalangas, Yesusva mani mani mani vowel vev. Seilva angumi vevna, wo daipotava beswonam helwolv, moahuiva, eva nomba henga moa ishuv.

8

Yesus Innepeta Pavmong Vinna, Mindnam Phona, Wo Os Indhanamba 4000pelara Dahwol Vena.

Matiu 15:32-39

¹⁻² Wenokombowonamba owai, indhanamba mindnam lelnam Yesusina kusonamba, Yesusna moam hellelm vevna. Wo Yesus hevtindim unna, kusotok, no indhanam kava wavra vovhueinv, manara noinda sambla mongonin pimund doa

aevvna, wo daipota innehui. ³ Wo pondava kava hengava wolanga verava hevna kembellam, monglava ata ponda daikaka velangavav, manara mongova monamba murama. ⁴ Wo Yesusm hevtindi umnina, huiva osomba lohvmoa, henimimba ata no indhanamba dahwol vivav, owai? ⁵ Wo himba osihinna, es yimba innemba ieivv? Wo hev una, 7pela rotiva kava ieivv.

⁶ Wo Yesus indkumbim indhanam nom unna, hui pethasra avhoapro. Wo roti no 7pelara dombnamba, wo Sesoam os ishovongo ovomnana, lehra yimba kamba dembrahuni. Doa englana popowol venamba, hevtindim unna, moang viwul vinu indhanam, wo osva vina. ⁷ Tambkopetava eva Yesusm dembrehunamba, wo Yesus henga Sesoam os ishovongo ovomna, besal, doa henga unna, moang viwul vinu, wo osva vina.

⁸⁻⁹ Wo hlanamba, doa emba pilivhoangu vina, wo no indhanamba eva indpetamma, hui 4000pelara lohvna. Wo nomba innemungilva hetindiva henga wondara nunguna, wondamba nomba 7pelarava pilivhoawol vena. Doa indhanamba nokra Yesusva unna, doa deuvram pevindam gapiangu veo. ¹⁰ Doa nonamba lelnam Yesusva nominiva botra wonvongana hevtindimba. Wonvonganamba, Dalmanuta petharam wonga.

*Varisinindva Yesusmba Dasalm Umnivna.
Matiu 16:1-4*

¹¹ Doa monglava Varisinind ambanamba, Yesusm ambo dasalm osihminivna, os umnivna, kana novra mana ema mendekli vintuk, wo osva

kava yemba nunglutithueivav, tanam Sesoaa hev yemba pusvundthoana. Himba Yesusmba undnahonamba lovahmanavnamoa, himba ambo dasalm umnivna. ¹² Wo Yesus mindnam ninginvna hona moarava, undva henamba potra pihamnana. Doa hev unna, es hevpa yimba ambo novolm ambvma. Yemba kava tanamolnam ishunv, kava yena novrava mana vemamba mendekliva vinvmoa, owai.

Yesus Olhmona Ishunna, Kuwulna Wevsava Sahoklal.

Matiu 16:5-12

¹³ Doa Yesusva henga nominiva hevtindim wonvenamba, botra wonvongavna, plombmonam wongavnamba, ¹⁴ wo hevtindi umnina, pai, pimba innemba dumbimoa, rotiva mongasal memba nungaihalohv. ¹⁵ Doa Yesus unna, ai kam hillu, manam yimba Varisinindna Herotkuwulna rotiva hleinvav, owai, aembu, henamba sahoklal vilinv. ¹⁶ Wo hevtindiva no moam hillinamba, wo hevm asahmana ovna, manam osva oi, pimba rotiva dumbimoa, wo hlavavmoa.

¹⁷ Wo Yesus unna, manam yimba pevpa osva ishuv, kava rotihui. Mendah kana olhmomba yimba tit vrivma, undhui yimba vilovma? Kava rotimba ovmoa, kava Varisinindm eva Herotm nom unvna. Hena wevsava indkoklal luhunv, wo yimba hena moamba hillindava, yimba eva os vivavta. ¹⁸ Wo yenamba novpa lovahinv, heva os owai, yimba nunglivmoa. Yenamba aongva lovahinv, heva os owai, yimba hillivmoa. Yimba kana moamba levrapiolvmoa owai, mendah yimba tit viv. ¹⁹ Yimba nunlinama, nomba seilva temba kava rotiva 5pelarava popowol vinnamba,

5000pelara indhanamba dahlwol vena? Wo innemungilva nomba, es wondamba lohna, yimba nunguwul vinamba? Wo hevtindi una, 12pelara wondamba.

²⁰ Wo Yesus henga unna, lehra, wo kava henga rotiva 7pelarava popowol vinnamba, doa 4000pelara indhanam dahlwol vena, wo innemungilva nomba es yimba nunguwul vina? Wo una, 7pelara wondamba. ²¹ Doa Yesus unna, lehra, heva os owai, mendah yimba levrapivolvmoa kamba, ora snal lohv.

Yesusva Mongom Novtigmungilm Sishona Vrena.

²² Doa nominiva wonganamba, Betsaita kembella di wonpho, wo botrinimba wonholopenamba. Wo indhana mongom novtigmungilm waiambanamba Yesusindam, wo Yesusm osihminina mindnam, engla holothomno, lesvhoara, noinda os novvera beswonam henga. ²³ Wo Yesus kleihavranamba nom novtigmungilm, doa oklapetam wainga kembelliniva, wo muembna novval pelpethamnana, wo os englanamba kevra, es hevpa yimba doa beswonam novvevma? ²⁴ Wo no tendoriniva eskand ambo novvevnamba, ona, kava nongalv, maim oi timba lovahv, heva os owai, lovahmana vev, wo noinda kava os nongalv, indhanamba.

²⁵ Doa Yesus henga novval kevra, wo beswonam he wohnovvevnamba, beswonam mana emamba nonglavna. ²⁶ Wo Yesus omnana, pevna deuvram wohgao, di ishunu, wo homba hengava indhana-musarava manam yimba sihavav, owai.

Pita Moakus Ona, Yesusva Mendekli Lohv, Kristus.

Matiu 16:13-20, Luk 9:18-21

27 Wo nominiva Yesusva wonvenamba, Sisaria Vilipai kembellam wongavna, wo monara Yesus hevtindim osihinna, indhanamba indkumbiva es hevpa kamba ningminiv, an hevpa kava lohv?
28 Hev umnina, monglava yemba os sevriv, Yon Baptais henga pokamarini lohv. Wo monglava os uv, yimba Elaita moashulnindrini, doara pethara men amana venam, wo monglava os uv, yimba mongo Sesoana moashulnindrini, ten doara pethara hui men euvmona venam, wo henga beswonam phona.

29 Wo hev henga unna, yimba pevpa es eva kamba ningminiv, an kava lohv? Doa Pita omnana, yimba mendekli lohv, Kristus, doara Sesoa yemba pusvundthoana, wo hom petharam yem doa wolaihapihana, kam kolvwrowol velm. **30** Wo Yesus unna, lehrata, heva os manam yimba hona moamba moakus uvav, owaiangas.

Yesusva Hevtindim Unna, Kamba Si Dahavav.

Matiu 16:21-28, Luk 9:22-27

31 Doa nonam moakus unnata, osva ona, kamba si sahokla vrivav. Kava arana ombol lohv, heva os kamba si hilvvivav, nihsesoa vrivav. Indkumbiva nomba mundil, katekis, sembayang andranindna kuwul, himba kamba si musk vinivav, wo kamba helvakomandhivav, kamba si wohdahavav. Heva os simba sambla si elohvrava, si kava henga beswonam phovav pokamarinimba kavna nihna. **32** Wo Yesusva osva moakus unnamba, wo Pita Yesusm waingana oklapetam, okusv vena,

manam yimba osva ishov, kamba si dahavav.
33 Wo Yesus umharavhoanamba, hevtindim non-galvnamba, Pitam ononglavna, wuleihao, Setannamini yimba moamba kovovrav. Yimba ambo titmom ishomnav, wo Sesoana nengavnangva yimba tit venav.

34 Wo Yesus unnamba, ombandhanamba kusorava, kam hillu katindimongo, himba nomba kamba engpethalmba vevrava, osva katindilmba sihalmba vevrava, heva os himba nomba hevna nengavnangva wuleihavra, kana nengavnangna vevra. Osangas vevra, wo eva lehra himba keknam lohvra ungundna novrava. Manara, noinda si ungundva hemba nihsesowolm vinivav, os kavm men. **35** Heva os himba nomba hevna niftovpa lelh vrevrava, os nengvra, es kava beswona-mangas avra, hemba nomba si dahavav, wo Sesoainava si avavmoa. Heva os himba nomba hevna nengavnangva wuleihavrava, kana kek vethavra, himba nomba si wohlohvav Sesoain-damba. Himba hevna nengavnangva wuleihavrava, wo kana besal nemelmom hellevra, wo indhanamoserava ishomana vinvra.

36 Katindiva osangas vivra, wo es hevpa mongo indhanariniva hevna nengavnangva vevrava, wo wohva esvema huhul vevrava hona petharava, wo sisva dahavra. **37** Doa es hevpa himba nomba besalmonam gavavma, owainonoa, mani hevna woh noi si kolrvavavma, owai.

38 Doa himba nomba yeriniva pemba vetava, osva kanamba moamba ishuhuiva vintava indhanamoserava, hemba nomba kava si beswonamba nonglavavmoa, nonamba hengava kava provrava. Manara noinda himba lou vivna,

kana moamba ishunilmba hona pethanindmba sahoklalva. Kava arana ombol lohv, doa kava si sewonam henga hona petharam provav, Sesoana besal ovsongolnindm kava si os wonprovav, wo nonamba Sesoana pusambakambava kam lovhoamnavav, pethanindna novpa sowaivunvav.

9

¹ Wo Yesus mendah ishongeinna, hillivm beswonam, tanam kava ov, hona pethara si Sesoana nemeltindiva musera phovav. Si phorava, yimba monglava mendah si os pehnana lovahvav, wo pevna novna yimba si os nunglivav, uvav, keknamangasm lohv.

*Yesusna Nihva Lovhoamnavna Mindnam.
Matiu 17:1-13, Luk 9:28-36*

² Wo 6pelara simba shulanganamba, Yesus vena, Pitam omnana Yemsm Yonm nom unna, wo mongo olora wonvongo hevho. Doa himba ona nunglina, pai, Yesusna nihva doa nilhai, ³ wo kayenmba lovhoamnav henamba dombalnonoa, oi okomba lovhoav. Anna eva malova osva phovav, ponamba sabonnamba pos verava, owai, osva henangas vei. ⁴ Henga ona nunglina, pai, doaramini simbehumunil sambla Mosesi Elaitai wai ihisholohv, no Sesoana moashulnidrini sambla doara ten ahamana evevnam.

⁵⁻⁶ Doa Pitava Yemsua Yonmba, himba mindnam pem wonvevna, moamba beswonamba ishuvnamoa. Wo Pitana moa di kuelwolgana, ona, lehra kava ambei homba, yem nongalalm. Ka thindruv wondembrawol vei, vera yem, Mosesm,

Elaitam, honam. ⁷ Wo Pitava mendah ishovna, wo tekopukul pihanamba, mera ve, wo Sesoava no tekomera di moamba opinna, kana memba ombolnonoa, hem kava mindnam und vev. Hena moamoa keknam yeoa hillimnivm. ⁸ Wo Pita Yems Yon henga hev ona novvina, pai, Mosesiva Elaitaiva es evei, Yesusangas hevho lohv memba.

⁹ Doa henga wonpiha olorinimba, wo Yesus unna, manam yimba ishunvav indhanamba, osva temba yimba nungliva. Kava arana ombol lohv, wo kava si pokamarini henga phovav, wo nonam daha yeoa moakusunu, temba pevpa nungliva. ¹⁰ Wo moamba nomba wohkek vithina hevm samblamongo indhanamba, doa hevm asahmana ovna, hona moamba Yesusva memba oiva, osva kava henga si phovav pokamariniva, honamba es hevpa dihi plalva lohv? ¹¹ Doa hev henga Yesusm osihminina, es hevpa katekisva os pimba ishowol velvohinvna, nomba Elaitava simbehumilliniva hona petharava si hengava phovav miva, wo Kristus hev si os phovav sis?

¹²⁻¹³ Wo Yesus henga unna, tanamta, Elaitamsna miva phovavta, wo mana emamba mana emamba os nemel henga wohvewol vevav, wo daha Kristus hev sism phovav. Wo men kava yemba ishunv, Elaitamsnamba doa doara phona hona pethara, Yon Baptaisangas.

Wo doa yimba nonora, indhana hevna nengavnangna hem sahokla vrimnina, doa helvakomandhina. Os vinina, ten doara Sesoana moashulnindrini tombaira novol venam. Wo yimba nunglinama, mongmomba tombairava novol velohv, indhanamba Kristusmba hevmba

dembhimnivav eva kinwonda plothumnivav, men kamba.

Yesus Mongo Tuendisrinim Tihsongomungilm Wolaihaphona.

Matiu 17:14-21, Luk 9:37-43

¹⁴ Wo Pita Yems Yon Yesus no olorini peivvnamba, ona nungeilna, pai, indhanamba es kusoi. Wo mongova Yesustindiva mera vina, katekismund hevm di anonglamana ovovna.

¹⁵ Wo Yesusva ona phona, no indkumbiva una, pai, Yesusva hevpa ten prov, wo Yesusindam dem gapianamba, di mapotho ovrivna. ¹⁶ Doa Yesus osihinna, manamoia yimba eishovna?,

¹⁷⁻¹⁸ Wo mongo tendorini os sevrana, ombmba kanamba tihsongomungil menav, moamba ishowol vevmoa, wo no tihsongova ombva doara vromana vev, pethara lukuhpe, wo mius vevpa, wo lo bombothovpa, kikmik vevpa. Wo noinda yeindam kava waiproj, wo yenisrava yetindim kava osihiniva, tihsongom ombnamini wuleihingimnu, heva os owai, lehloh venapia, owai. Nom kava ishuvna.

¹⁹ Yesusva no moamba hellenamba, unna, yimba indkumbiva kamba undnahonamba lovahthamnavmoa, osva himba hona tuendisrinimba wolaihaphovav, wo slei kamba yeindava gimus vinivma? Doa tuendisrinim hom waiambo kaindam. ²⁰ No tuendisrinim waiambna, wo tihsongova Yesusmba nonglavnamba, tuendisrinimba kekel vevna, wo tuendisriniva eisvna, pethara lipe, di umharavho vre, mius vevnamba.

²¹ Wo Yesus aralm sah ovrana, es hevpa doara os vaomana venavma? Wo aral omnana, eie doara tueind venana. ²² Doara ambo hona tihsongova nihmera sihamnanamba, wo mindnam helvakomandhalm velohv. Os suwera luweihav, eva pora levelthav. Doa yeoa osoa kana ombm wolaihapho, tanam yimba wolaihaphovavmi owaimi? ²³ Wo Yesus omnana, manam yimba sambla undva verombvav, ai tanam ata wolaihaphovavmi owaimi? Manara noinda himba nomba kamba keknamba nengmanavrava, hemba nomba ata kava mana emamba mendekli venavav. ²⁴ Doa aralva mindnam omnana, kava os nengvta, yimba ata venavav, pev kana indoa keknam lotho, wo mindnam kava ata yemba os nengmanavav.

²⁵ Wo nonamba indkumbiva kusopravna, wo Yesus nongalna, doa mindnam tihsongom ononglana, wuleihao, wohgao, manam yimba hengava hona tuendisrininamba nihrava sihavav, yimba sahokla vrenamba mahui angumi hona tuendisriniva. ²⁶ Wo tihsongo weingo ovna eunillam, mindnam wongapola vrevnamba tuendisrinimba, doa os nihmerini phona, wohgana os. Wo tuendisrinimba nomba di vindilvna, wo indhana os uvna, doa wohdahai, ²⁷ heva os Yesus englaval kevranamba, wuleihapho, wo lohvna beswonam, tihsongo doa gana.

²⁸ Wo Yesus nominiva wonvenamba, mongona deuvra wonsiha, doa hevtindi hem osihminina, es hevpa eva manara kava owai viv, tihsongova nomba engalva? ²⁹ Wo Yesus unna, himba nomba Sesoam aram sahlohmanavna elsus, wo hemba

nomba Sesoa poauothovav, noinda tihsongova snamba himba engalomana vevav.

Yesusva Henga Hevtindim Unna, Kamba Si Da-havav.

Matiu 17:22-23, Luk 9:43-45

³⁰ Wo Yesus nominiva wonvenamba, Galili provinsra wonkohanamba, os nengvna, ata humeis kamba mongova indhanarinimba dihi nongalvav, ora men wongav, ³¹ manara noinda osm wonvevna, himba hevtindimangas wonamana velm vevna, os unvna, kava memba arana ombol lohv, heva os kamba si sahokla vrivav, wo si ungundna englisra desvhueivav, wo kamba si helvakomandhivav. Doa samblanin kava si verava pokamarava, henga beswonam pholahanga. ³² Wo hevtindiva hillivnamba, tit vivna, manam os ov, wo pem vimnivna osahmanalmaba, osva manam hevpa yimba osva onengv?

Yesus Hevtindim Unna, Manam Yimba Pevargas Ninginvra, Owai, Indkumbim Ninginvm.

Matiu 18:1-5, Luk 9:46-48

³³ Wo Kapaniam kembella wonphonamba, mongona deuvra wonsiha, wo Yesus di hevtindim osihinna, manamoia yimba monarava ishulambvna? ³⁴ Wo monarava nomba moamba ishulambanamba, an pina kuwulva nulluhunv? Yesushui hev ishuvna, wo noinda hevm alhwol wulambvna. Wo Yesus osihinna, wo himba lous vrivna, ata es ishumnivav, monarava doa pimba koasromb vei. ³⁵ Doa Yesus avhoanamba, unna, hui aevtho, moapeta yemba kava ishowolm vinv. Himba nomba yeriniva kuwulva nulluhulva

vinvrava, hevmangasva owai, indkumbim ninginvra.

³⁶ Doa Yesus mongo otollnim kleihulprona-amba, wolaiha hovra. Wo englana hev nimbis othomnana, wo hevtindim henga unna, ³⁷ himba nomba hona otollinimsnamba beswonam mapotho ovrarava, oi otolva Yesustindirini, wo himba nomba kavmba osta mongawulmba mapotho ovrvav. Wo himba nomba kamba osva mapotho ovrarava, himba nomba Sesoamba hevmba eva osta mapotho ovrvavatva mongawulmba, nom ten kam wolaihapihanam.

Yesusva Hevtindim Unna, An Pinamba Sehelva Luhunv?

Luk 9:49-50

³⁸ Doa Yon Yesusm omnana, kava indhanarinimba os nunglina, tihsongom wolanga vevna indhanana nihmerini, wo yena nihilva sevromana vevna, os tihsongom wolanga vevna. Wo noinda kava ovumnina, yimba karini luhunvma? ³⁹ Doa Yesus unna, manam yimba osva hengava vivav. Himba nomba mendekliandrava vewol vevrava, kana nihilva sevromana vevrava, indhanam os wolapho vevrava, himba nomba kamba dathovavmoa nunginamba. ⁴⁰ Himba nomba pimba vreipra vremba owai vitava, himba nomba pina sehel pina mongawa andranindrini. ⁴¹ Tanam yemba kava ishunv, indhanariniva yemba nongalvra Kristustindi, wo noinda yemba ambo pongas dahwol vevra, no indhanarinimba sesva si kava nesmos vrevav. Tanamolnam kava ov.

Yesus Unna, Si Humeis Yimba Pevna Sahoklar-ava Indkokla Vilovm.

Matiu 18:6-9, Luk 17:1-2

42 Wo Yesus henga unna, memba wevsahahoklal prov, indhanarini otollinim mai vrev, wo noinda otolliniva sahonamba vev, nomba temba kamba lovahmanavpa indnahonamba. Sesoa nomba indhanarinimba kinwonda plothomnavav os i, wo himba os ovav, pai, kamoa doara dahata wanplombra, kava ata osva indkoklava vetamo. **43-44** Doa henga olhmona unna, himba nomba sahoklava noi hevna englanamba nengvtava, os maim ora, englaoa nooa kanaoa kav kokoihang vera. Os kava si Sesoaindam mongawa englana gavav, sambla englanamba si humeis kava suweram gavm, no suwemba wohtawov.

45-46 Doa himba nomba sahoklava noi hevna monglanamba nengvta, os maim ora, monglaoa nooa kanaoa kav kokoihang vera, os kava si Sesoaindam mongawa monglanamba gavav, sambla monglanamba si humeis kamba suweram holopisuvvm. **47-48** Doa eva himba nomba sahoklava noi hevna novnamba nengvtava, os maim ora, novoa kanaoa kav velaihang vera, os kava si Sesoana kembella sihavav mongawa novnamba, sambla novnamba si humeis kamba tembaikassra pilpiangivm, domba temba nembelta kamba wohwehlavav, suwemba wohtawovav.

49 Doa mendah olhmona ishunvna, yimba katindiva yeoa indkumbioa keknam lovahthavm, manara noinda Sesoa yeinda wanna itowol vevav. Wo no wanmba suwemsna tavav, yena

indkoklava poswol vinvra, oi helavlasowa povolv. ⁵⁰ Wanmba besal hevpa, heva os wanmba tepepeva vetava, es yimba vivav, wo hengava bes vevav, owai. Noinda osva yeoa pevmoa wanmsna beswonam ningehaloho, wo etemboslamsna beswonam aevultho.

10

Yesus Ona, Ungevlirinimba Manam Pilpiangivav.

Matiu 19:1-12, Luk 16:18

¹ Nominiva wonvenamba, wo Yutia provinsram wonga, venamba, di Yotan popethalla wonpho. Wo indhana di mindnam henga kusomna, wo Yesus henga wonishomana vena hevna wevolm. ² Wo mongla Varisinind ambna, osm ambvna, Yesusm dasalm sah ovrlim, doara ningna, heoa ata Mosesna lohohmom moakoklana ishomnavra. Wo Yesusm umnina, es yimba nengy, tendorini hevna ongalmba wohwolaihangavavma, es hevpa beswonam kava osva vivmi? ³ Wo Yesus unna, Mosesva doarava es Sesoana moamba novol vena, tendoriniva ongalmba wolaihangavra? ⁴ Wo henga he umnina, yimba nonora, Mosesva os novol vena, himba nomba ongalmba pilpiangatava, boasna tombairasna novol vevrava, ungevlirinim vraho, os pilpiangavra.

⁵ Wo Yesus unna, lehra yimba uv. Heva os Mosesva noinda novol vena, ye yena simbehumunpev kelsombovho vivna, Sesoana moamba hillivnamoa. ⁶⁻⁸ Manara noinda Sesoava hevpa seilva nengnamoa osva, owai, himba

seilva manimani vaomana vena, doa vewolna tlalm ongalm, wo unna, tendoriniva ongamba vrarava, araravalmoa wuleihowol vevra, ongaliangas ahavra, wo si os uvra mongongal, wo noinda mongawundna wohahamana evevra.
9 Sesoava hevpa temba ningewol vinv, manam tendorinimba snamba pilpiangavra.

10 Wo dawonam deuvram wonganamba, di deuvra hevtindi osihminina no ongamom, Yesus hev ten nom Varisinindm ishunim. **11** Doa Jesus unna, himba nomba hevna ongalva pilpiangavrava, wo mongom vravra, himba nomba osva ongom sahokla vrevra Sesoana novrava. **12** Wo honamba eva os lohvta, ungevliriniva tlalmba wuleihaiava, mongona tlara vongo, osva eva indkokla vevta Sesoana novrava.

Yesusva Unna, Lehra Otolva Wonambv Kain-damba.

Matiu 19:13-15, Luk 18:15-17

13 Doa mongona indhana otolm wonambvna, Yesusinam wonambvna, osm Yesus awothowol vera, eva englana kekaiv vevra. Wo hevtindi onungli, engilwulve, **14** wo Yesusva nongalnamba, ongowolna hevtindim, manaram yimba engilv, lehra otolva wonambv kainamba. Honamba otolva Sesoam lovahmanav indnahonam, wo indhanamba mundilva si osta virava, sna indhanamba si osva Sesoana nemeltindilm saivvav. **15** Tanam yemba kava unv, himba nomba Sesoam omnamba owai vetava, hona otolmsna ovramo, aya, himba nomba Sesoana nemeltindilm si si-havavmoa. **16** Doa nom otolm unvnamba, wo kekaiv vawovna, unna, Sesoa yem beswonam wonvera.

Yesus Indhanarinim Wohtowondm Omnana, Indhanam Moang Vepieinu.

Matiu 19:16-30, Luk 18:18-30

¹⁷ Wo Yesus nominiva venamba, monam mendah gavna, indhanarini mongo lelnam pronamba, mulumbdandna di lohvhoa, wo Yesusm osahmana, guru, yimba besal, es hevpa kava vevrava, wo Sesoava kamba si hevna kembellava waiavav? ¹⁸ Doa Yesus omnana, manara yimba kamba osva omni, besal, Sesoangas besalva av. ¹⁹ Men henga yemba kava ishomnav, yimba pev nonora, Sesoana moamba lohv. Os manam yimba indhanarinimba helvakomandhavav, manam yimba goariskuiva vevav, manam yimba yukovpa vevav, manam moangakalava yimba ovav, ararapevna moamba hillinvra.

²⁰ Wo he Yesusm omnana, kava eusilva mendah vevnamba, veiva daipota, hona Sesoana moam kava engomana vev. ²¹ Wo Yesusva nonglavna, doa und vevna, doa omnana, mongongal moamba yimba mendah vevmoa. Garava, wohoa dioa indhanam moang vepieinu, no indhanam dihui ten euvmona vevm, verava, yeoa katindilm sihao, wo pioa mongawulm lovahmana ve. Yimba osva vetava, Sesoava yemba si beswonam kokolma venvav diva hevindamba.

²² Doa no indhanarini wohva diva mindnam iavna, wo no moamba hellenamba, undva henamba potra pihamnana, novlomosva henamba sahoklatov selthoana, doa Yesusnaminiva noinda wohga. ²³ Wo Yesusva nonglana, himba gavnamba, hevtindim nongalna, unna, snamba indhanamba wohva

diva temba mindnamba ieuvmona vevpa, sna indhanamba si saha vrowovav, sihalmba Sesoana nemeltindilmaba. Es eva, melva kekelmel.

²⁴ Doa hevtindiva no moam hillivnamba, una, pai. Doa Yesus hev unna henga, tuendis kana, owaita, Sesoana nemeltindilm es eva ombamba saivvav. ²⁵ Wo olhmona henga unna, es hevpa miemba sihavavma meiskismerava owainonoa. Osta eva no wohnindva Sesoana nemeltindilmaba es eva saivvav. ²⁶ Wo hevtindiva no moarava os uvna, pai, pai, an eva si beswonamba sihavav Sesoana nemeltindilmaba?

²⁷ Doa Yesus hem nongalna, unna, heva himba nomba hevna nengavnangnamba Sesoana nemeltindilmaba sihavav, heva os owai, heva Sesoana andrava memba hevargas heva vowel vev, indhanamba wonsihalmba hevtindilva.

²⁸ Wo Pita ishomnana, kam nongalo, doa kava kavnamba wohva dembrehalaha ambna, wo men kava mongawulm lovahmana vev yetindilm, kamba si es yimba vinvav? ²⁹ Doa Yesus unna, yemba kava tanamolnam unv, himba nomba kamba engpithivrava, wo kana besal nemelmoa ishuvmona vinvrava, himba nomba nombalvhoawol vivav hevna owalmба, etehumunilm, muskovolm, towandaslalm, araravalm, molombolm, deuvm, osom.

³⁰ Heva os hemba nomba si kava mana ema esvema sesm vinvav hona petharava, kava sesm vinvav deuvm, etehumunilm, muskovolm, avalm, molombolm, osom. Doa kana ungundva hemba nomba sahokla vowel vivav. Heva os sewonamba Sesoana kembellava himba si beswonamangas wohaevvav. ³¹ Wo himba nomba daipotava indhanana kuwulva

ilvahinvpa, sna indhanamba si nonamba vahsingiva lovahvav. Wo himba nomba daipotava memba vahsingiva lovahvpa, sna indhanamba si sewonamba mendeklilmба lovahvav.

Yesusva Henga Unna, Kamba Si Helvakomandhivav.

Matiu 20:17-19, Luk 18:31-34

³² Wo Yerusalem monam wongavna, Yesus hev miva gavna, wo hevna hellelnindva sis angavna, mindnam duus vivna, Yesusmba mani si vimnivav di Yerusalemra? Wo mongla indhanamba sis enggivna, pem vivna. Wo Yesus hevtindim unna, indhanahuiram hui kusotok. ³³ Doa yem ka ishuni, os si kamba vinivav Yerusalem kembellava. Hillu beswonam, Yerusalemram pimba angav, wo kava arana ombol lohv, heva os kamba di ungundra wetat unvav, wo sembayang andranindna kuwul eva katekis kamba moa waiishuvav, ora nonam si yemba helvakomandhivav. Verava, kamba wetat umnivav di meisungundinda Romduanginda. ³⁴ Wo himba eva kamba osva vrepra vrevra. Wo indhanamba kamba si os muembkosvna wehlavra, evndakalna hilvivra, wo verava, kamba si wohhelvakomandhi. Wo samblanin ambo kava verava, wo henga beswonam pho.

Yemsi Yoni Kuwulalm Eloholm Ohona.

Matiu 20:20-28

³⁵ Doa Sepetina ombolsambla Yemsi Yoni epranamba, Yesusm ohomnana, kava moapeta yem wulelohmanav. ³⁶ Wo Yesus unna, manamom hevpa yimba kamba sahalm

ohomnav? ³⁷ Wo himba ohona, os kam vinu, kava kuwulalm si elohe yeinda murapeta, vevra sihanasis lohvra mongova, mongova nihanasis lohvra, yimba si sewonamba kuwulalm lohvra indhanana indkumbina novrava.

³⁸ Wo Yesus henga unna, yimba kamba ohosahmini, heva os yimba mendah tit ehev hona andramba. Es hevpa kanamba yimba kinkumbi tanam ambo pulengavavma? Wo kamba nihsesoava vimnivrava, yimba kamba tanam eheng-pravavma? Ungundva yemba helvowol vivav, wo yimba ambo tanam keknam elohvavma? ³⁹ Wo himba ohomnana, kava tanam si elohvav. Wo henga Yesus unna, tanam yimba si nonamba kinmba kanamba pulengavavta, wo yemba eva si nihsesoava vinvav. ⁴⁰ Heva os memba kamba ohosahmanavnamba, osva kuwulalm kam awowol veo, owai, kava unvavmoa, Sesoangas heva hev hona andramba pusvund vev.

⁴¹ Doa monglava 10pelava Yesustindiva hillinamba, Yemsiva Yoniva os evena, wo os musk vinvna i. ⁴² Wo Yesusva lihawol venamba, wo hevtindim unna, kusotok, yem ka ishuni. Yimba pev nonora lovahv, kuwulva himba nomba temba ilvahinvpa puehlnindnamba, indhanamba hena keusingi lovahinv, hengas ondal vowel ovovra, wo himba vengas viv hena moara. ⁴³ Wo yemba osva ka unv, manam osva yimba katindiva lovahv, owai, kuwulva yeriniva snamba luhunvmoa. Himba nomba kuwulva yerinimba hovrava wulluhunvtava, wo heoa ambo andranindriniimsna luhunvra, wo yemba wonandra vevra.

44 Doa himba nomba yena kuwulva wulluhunvtava, heoa hevna nengavnangva maivethavra, wo indkumbina nengavnangra andra vevra, os kav men vevm. **45** Kava arana ombol lohv, wo heva os kava osva pronamo a hona petharava, wo ondal vewol ovoe indkumbimba. Owai, kava osm prona, indkumbim ambo kollombvra. Wo eva kamba si dahavav, wo nonamba kava indhanamba mindnam kilumbshuawol vevav hevna sahaposworiniva.

*Yesus Mongom Novtigmungilm Sishona Vrena
Batimeusm.*

Matiu 20:29-34, Luk 18:35-43

46 Wo nominiva wonganamba, Yeriko kembellava wonkohavnamba, ambo wonkohangavna indkumbim hevtindim, ombandhana eva mongawulm gapiavna. Wo mongo indhanariniva novtigmungilva monara avna, nihilva Batimeus, wo himba Timeusna ombol. Monara ambo avna, indhanamba okohowovnamba, ambo himba owovna, senpeta kam aiv velaihakov venavm, osoa dombvna. Wo hev di avna, Yesusva nonamba wonongovnamba, **47** doa os hellenamba, Yesus Nasaretrinimba men wonokohov. Doa he mindnam di wunuho, os Yesus, yimba mendekli Devittindirini, kam wavra vovhoamno. **48** Wo indkumbi di lalkoho, os wuleihao, wo henga he di mindnam wunuho, yimba mendekli, kam wavra vovhoamno. **49** Doa Yesusva hellenamba, lohvhoa dawonam, unna, umnu no indhanarinim, kaindam prora. Wo anganamba, novtigmungilm umnina, indk vetho, pho, Yesusva yemba omni. Gao Yesusindam.

50 Wo himba lelnam phonamba, bayupanasva selvhsapingavna, lelnam Yesusindam gavna.

51 Wo Yesus omnana, es ata yemba kava venavav? Wo hev omnana, kava henga beswonam novvelm vev. **52** Wo hev omnana, gao, yimba kamba indnahonam lohmanav, wo noinda yemba kava sishona vrei. Wo noinda he beswonam nongalvnamba, Yesusm engpetha, no monam angavnam Yerusalemram.

11

Jesusva Yerusalem Kotara Kuwulalmsna Sihana.

Matiu 21:1-11, Luk 19:28-40, Yon 12:12-19

1 Wo murava wonvenamba Yerusalemrava, doara wonkuvhoawol venamba kembelsamblamba eusilva, no kembelva os uv Betpaki Betani. Wo diva murava olomba nomba os ningthiv oliv denwit. Wo nominiva Yesus unna hevtindirinim samblam, **2** mi yesna engo no kembellam, wo yimba ata donkitam enonglavav, no donkirava indhanamba nonamba lovahmana venamoa doarava. Ohomnarava, waiepra, **3** wo anemamba yemba osva sah owol vetava, manaram yimba donkitava waiengav, os uhunu, Yesus mendekli nona lohmana velm vevpa, ata lohmana verava, henga ata waiambvav lelnam.

4 Wo enganamba, enonglana, men donkitava lohv, wena kleihinamba, monapethalla lohvna di deuvra. Wo himba donkitana wemba epelvhovnamba, **5** wo indhana sah owol vi, manaram yimba donkitana wemba epelvhov? **6** Wo heuhunna, os Yesus ten doara hevm ishunnam. Wo hev unna, wouta waiengo. **7** Doa himba donkimba

waienganamba Jesusindam, wo hevna malova sena moan vehola evena donkisra, wo Yesus nosra avho, Yerusalemram os noinda gavna.

⁸ Doa indhanamba hevna wevsava doara vowel vivna, hemba nomba kuwulalva pusvundthueivnamba, wo seilnovrava sihavnamba, monarava os vavta velahangavna kayenmba nemel. Wo tivtanda besal vlel hilhala uvnamba peillini, monara vavta vilafeingivna, osm kuwulva dakonda vil-siha. ⁹ Wo Yesusva nonamba sihavnamba donkinamba, indhanamba vena mi sis, Yesusva hovra lohvna. Doa saivnamba, indhanamba kingawonga vruwul ongowovna,

Os hosana, osm uvna, Sesoam kava okuliv, wo hev yem poauothovra, yimba hevna moara kuwulalm meprov. *Buk Song 118:25-26*

¹⁰ Wo yimba si kana kuwul wulluhunvav Devitna vuhera, ten doara heva kana simbelna kuwul wulluhunvnam. Wo henga kingawonga vruwul ongowovna, hosana.

¹¹ Wo Yerusalemra diva phonamba, tempella siheine, no tempelva Yutanindna mendekli sem-bayangduv luhunvna. Wo di mera mum vaomana vena, doa simba okilvravnamba, nominiva wonganamba hevtindim, wo henga Betanira ninmba wonlina.

*Jesusva Tim Fikm Omnana, Yemoa
Wohsoulara.
Matiu 21:18-19*

¹² Wo mongnasiva henga nominiva wonvenamba Betaniriniva, doa wonprona henga Yerusalemram. Wo monam wongavna, Yesusm pon vene, ¹³ wo mongo tim fikm nonglalm siha monapethalla, nomba fikva vlelva

mindnam lohvna. Doa Yesusva sihanamba, nom fikmovm silelvna, movol endvmi, heva os owai, novvelohvnamba, endvnamoa, mendah. ¹⁴ Doa Yesus no tim omnana, kava ovov, movolva yemba si hengava endvavmoa, hlalmба, yemoa wohsoulara. Wo hevtindiva no moamba os hillina.

*Yesus Bisnisnindm Engalungu Vena
Tempelmerini.*

Matiu 21:12-17, Luk 19:45-48, Yon 2:13-22

¹⁵ Wo Yerusalemra wonphonamba, henga tempella wonsiha, doa bisnis indhanam nom tempelmerinim engalungu ve, di esvowolvnam. Vevnamba, no indhanana meyam mulgothowul vinvna, diva tholpingu vinvna, no meyarava duangna di dombawuvna sembayangnindna, wo tempeldiva dembreluhunvna.

Doa himba kursim mulgothowul vinvna, no kursirava di dombawuvna, leumb hemba holvorombrehunvna. No tempeldina leumbna sembayangnindva os vivna, dembvnama, leumbva sembayang andranindm holvorehunvna, suweram wiwehalm Sesoam, dingas hevpa disumbra dembhapuv vehal vevna.

¹⁶ Doa Yesus ovunna, manam yimba hengava wohva hona deuvrava huiva aisuv vevav tempellava. ¹⁷ Manara nengara tombairava Sesoana moamba os novol velohv,

Hona tempelva kana deuvpa memba lohvpa, os yepev Yutanind wo indkumbi annind annind hona deuvraoa kamoa sembayang vewuvmonavm. *Aisaia 56:7*

Sesoava hevpa os ona, heva os yimba vuhemba kelvhueinvna, dimangas ningminivna, noinda

deuvpa honamba os lohv, oi, indhanakoklana deuvpa.

¹⁸ Doa sembayang andranindna kuwul eva katekis hillinamba, Yesusm muembnavho vrivna, os ningvna, ombandhanamba Yesusna moam hillivpa, wo os luklukul vriv, lehra ovta. Doa noinda ishuvna, es pimba Yesusmba kevrirava poaita, helvakomandhalm? ¹⁹ Wo okombava vohavnamba, Yesusva nominiva wonvohavna Yerusalemriniva.

Yesus Hevtindim Unna, Yeoa Sesoam Keknam Pevna Undnahonam Ningminivm.

Matiu 21:20-22

²⁰ Doa mongnasiva simolnam monam henga Yerusalemram wongavna, no denwitm fikm ona nunglina, doa vlelva plalva wohksuvhoai. ²¹ Wo Pitava Yesusna moam nom omminim nengna, omnana Yesusm, nonglo, hona timba yimba omba omnana namba, doa ksuvhoai, ambo tanamolnam yimba saha vruluhna.

²² Wo Yesus henga unna, hi hevpa mana ema mendekli kava venama, snamba an ona? Yemba kava tanam ishunv, Sesoamoa keknam yeoa lovahmanavm pevna undnahonam. ²³ Yimba eva os vivavta, wo hona olomba yimba osva umnirava, wanplombra pilpeo, wo Sesoava osta vevav. Wo manam yimba sambla indva lowohivav, osva tanammi owaimi, mongawundnamba yimba lovahntava, Sesoava vevav.

²⁴ Wo noinda yemba kava unv, Sesoam yimba mana emamba osihminivrava, mongawundna vivm, wo yemba osva Sesoava vinvav. ²⁵⁻²⁶ Wo yimba Sesoamba sembayang vinirava, yeoa

boasna indhanana indkoklaoma maisasa vrinu, temba yemba indkoklava vininamba. Manam yimba hengava ninginvav, esesmba velmba, owai. Yimba osva vivrava, wo yenamba Sesoava arapevpa osva si sahoklava maikumi vinvav.

*Yutanindna Kuwul Yesusm Sah Ovrivna, An
Yemba Pusvundthoana?
Matiu 21:23-27, Luk 20:1-8*

²⁷ Wo Yerusalemra henga wonphonamba, tempelmera wonlohmana vevna, wo monglava kuwulva prapia, sembayang andranindna kuwul, katekis, Yutanindna mundil, himba Yesusindam prapia, ²⁸ wo umnina, an yemba omnana, wo noinda yimba osva vowel vev? An yemba pusvundthoana, wo noinda yimba bisnis indhanam engalungu vevna hona tempelmeriniva?

²⁹ Doa Yesus sesm unna, dawonam, yem kava sah owl velm vev, wo yimba kamba ishumnitava, osva ata yemba kava moakus unvav, henoi kamba pusvundthoana, noinda kava osva vowel vev. ³⁰ Yimba pev doa doara nunglina Yon Baptaisna andramba. Wo an Yonmba pusvundthoana, ora indhana ambo, ora Sesoaa hev? Wou kam ishuminu.

³¹ Doa kuwulva nomba hevm poaita ishuvna, osva pimba umnitava, Sesoaa hev Yonmba wolaihaprana, wo himba ata os ovav, esm yimba Yonna moamba eva engangava owai vivna? ³² Wo pimba umnitava, indhana ambo Yonmba pusvundthueina, owai Sesoava, ata pimba ombandhanamba helvowol vivav, manara noinda himba os ningv, Yonmba Sesoana

moashulnindrini. ³³ Wo noinda Yesusm umnina, es ata kava yemba ishumnivav, an Yonmba wolaihaprana, pusvundthoana, kava tit viv. Doa Yesus unna, yimba kamba beswonamba ishumnimoa, wo noinda ata yemba kava moakus unvavmoa, osva an kamba pusvundthoana, noinda kava osva andra vevna.

12

*Yesusva Olhmona Unna, Yutanindna Kuwul
Kana Moamba Aongpa Viv.*

Matiu 21:33-36, Luk 20:9-19

¹ Doa Yesus no kuwulm olhmona ishunvna, mongo indhanarini oso wolavnamba, no osomba weselmuvoso, no weselmuvpa os ningthiv grep. Wo pueilva ningivnamba, doa mongo mel tovhoanamba, grepmovm noinda polm sovhowolalm. Doa kekalvhoruppa membrana, noindam hevna osom kelvhoalm. Wo monglam andranindm himba sandhana, diva osorava andra vivna hevnisra. Doa himba hevpa dawonam wohgana, mongona kembellam oklam gana, os isholahangeinna, grepmovpa si endungu verava, si aembul ksuvhoarava, piv si moang vivav, vera yem eva kavm, yimba kana osondra viv.

² Doa aembulva vevnamba grepmovpa, wo osona aralva hellenamba, mongom andranindrini wolaihangana, omnana, gao nom kana andranindm undava, yem dembrehura kana grepmovoa. ³ Wo andranindriva ganamba, no osorava ona phona, wo no andranind kevrinamba, hilvi, umnina ambo posal gao. ⁴ Wo henga osona

aral mongom wolaihangana, ika. Wo henga andranind di kuwul powalmini, sahokla vruwul ve.

⁵ Wo henga osona aral mongom henga wolaihangana, wo andranind helvakomandhie. Wo osona aralva henga andranindm mindnam wolanga velohvna, heva os angavnamba, andranind noi monglamba ambo helvowol vivna, monglamba helvakomo vivna. ⁶ Wo osona aralva hev ona, owai, andranindva eivvmoa, kavna ombolm mongasalm waiavna, kava mindnam und vev. Wo hemba kava wolaihangarava, si beswonam hillimnivra.

⁷ Doa wolaihangana ombolm no andranindindam, heva os owai, hillinamo, wo una, hona tuendisriniva si mendekli verava, si os ovav, kana pethava memba, heva os yenamba owai. Wo helvakomandhalvohra hemoa, wo pivmangas hona pethava si wohluhunvav. ⁸ Doa noinda helvakomandhinamba, mindilva puehallam vindpingina.

⁹ Wo Yesusva olhmona mendah ishongeinvna, doa osona aralva es si andranindmba nomba vinlav? Es yimba ningv?, hev si osoram garava, no andranindm helvakomo vevav, monglamba andranindmba unvav, kana yeoa andra viu. ¹⁰ Wo Yesus mendah ishongeinvna, doa pev nonora, os Sesoana moamba tombairava novol velohv os, Andranindva honduv andembrana, wo mongova honmba nunglina, una, sahoklal, wo piengi. Wo heva os no honmba henga mongo andranindrini vra, wo no honmba daipotava lunitilm wohlothal lohv. ¹¹ Sesoava hev vena, wo pimba nungliv-

namba, wo besal hevm.

118:22-23

Buk Song

¹² Doa kuwulva Yesusna olhmomba hillinamba, liheivna, plalmomba pi inda, manara noinda Yesus hev ona, yimba indhanakokla. Doa noinda Yesusmba awusapramana venavna, bui velm vivna. Heva os owai, bui vinamoa, ambo ombandhananapenam pem vivna, humeis ata pim helvowol vivm, wo noinda Yesusva nunglul liheinamba, hevpa buketha.

Varisinind Yesusm Dasalm Umnivna, Osm Moakkokla Ishomnavra Duangm.

Matiu 22:15-22, Luk 20:20-26

¹³ Wo dawonam monglava indhanamba ambanamba Yesusindam. Mundil hemba wolambv vena. Monglava katekisva, ten Varisinindilm lovahvna, monglava Herot kuwultindiva, himba Yesusm sah ovralm ambna ambo dasalm, os ningvna, heoa moakkokla ishomnavra Sisa duangm.

¹⁴ Ambanamba, os dasalmomba ishumnivna, kava yemba nonora, yimba tanam ishowol vev, yimba mongawamoia ishowol vinv kuwulm, ombandhanam. Yimba mongawamoia ishowol vinv, yimba pemba vewol vevmoa, yimba musera ishowol vinv, yimba besmoa Sesoana moamba ishowol vinv indhanamba.

Doa kam hona moam beswonam ishunu, men pimba taeks velvohinvpa duangm nom Sisam. Es hevpa hona wevsava pimba beswonam vivmi owaimi? Sisa duangm piv taeks vimniv ora owai?

¹⁵ Wo Yesusva nonora luhunvna, unna, anm dasalva yimba umnivna?, hom sen

viliwulambrava, ka nonglai. ¹⁶ Wo mongova senmba Yesusm vilirehuna, wo Jesus sah owol vena, anna memba kuva namamba hona sendava kovopathalohv? Wo he una, Sisana duangna, pev nonora lohv. ¹⁷ Doa Jesus henga unna, hona senmba Sisa duang venamba, wo pimba taeksrava hevm Sisam henga dembraholvohv, wo manapenam, beswonam viv Sesoa novra. Doa Sisa duang pimba taeksm sehinrava, dambroh vivra, wo doa Sesoa hev mana vemamba pimba sehinrava, osva vinivav.

Wo noinda nomba mundilva os luklukul avrama vena, pai, Yesusva doa pina wemba pelpiko-heini.

Kuwulva Yesusm Dasalm Osihminina, Mindilva Tanam Pulvovavma Pokamariniva?
Matiu 22:23-33, Luk 20:27-40

¹⁸ Wo dawonam mongla kuwulva ambanamba Yesusindam, Statusilm himba lovahvna. No indhanamba os euvmona ovovna, si tanam mindilva pokamariniva pulvovavmoa. Doa Yesusm he dasalm osihminivna, ¹⁹ Mosesva doara heva Sesoa moamba novol vinna, osva mongova tendorinimba dahatava, wo ongalva otolhui amnavra, wo boasalal henga moamulmba pethavav, wo towand eve, wo no otolva indhanamba si os uvav, eisilna vuheram, ten doara dahnam.

²⁰ Wo men kava yem osihminiv, mongo aratindi 7pelara lovahvna mendekliangas, wo etelsna ongamba vranamba, wo etelmba dahavna, wo otolva lohmananamoa, ²¹ wo pelimba boasalal vra, vranamba, wo daha boasalalva eva otolmba waiamnanamoa. Wo mongo boasalal pelimba

henga eva vra vranamba, wo daha, wo osangas vruuvnua no ungevlirinimba. ²² Venamba, osangas 7pelara nomba aratindiva sihapiana, wo otolmba no ungevliriniva waianamoa, wo ungevlirinimba sism dahanata. ²³ Doa yem kava sah ovriv, sewonamba mindilva indhanamba hengava pokamariniva phopiarava hevna nihna, an hevpa hona aratindiriniva, ungevlirinimba nomba memba vruuvnamba, an hevpa vravav?

²⁴ Doa Jesus unna, yimba sahonam ui, manara, yimba tit viv moamba tombairinimba Sesoana moamba, eva yimba tit vivta, Sesoava keknamas-gas lohv. ²⁵ Mindil indhanamba indkumbi si pulvovav, doa si muhsoh lovahvav, os Sesoana ovsongolnind muhsoh aevvm.

²⁶ Yimba nonora, Mosesva temba nonglanamba suwemda taihavna tira, heva os no timba tavnamoa. Sesoava Mosesm nonam ishomnana, os kava mendah men mendekli lohv Aprahamna Isakna Yakopna. ²⁷ Sesoava os ishomnana, wo noinda Mosesva os wohlihana, no kana simbelva samblamongova, ten doara dalnam, mendah lovahv Sesoaindava.

Mosesva os lihanamba, wo noinda pimba liehiv, mindilva indkumbiva si tanam pulvovav pokamariniva henga hevna nihna. Honamba Sesoana moamba yimba levrapivolvoa, wo noinda yimba kamba dasalmomba ishumnivna, mindilva es pulvovav pokamariniva?

Katekis Yesusm Osahmanana, Heni Sesoana Moamba Kuelwolv?

Matiu 22:34-40, Luk 10:25-28

²⁸ Wo mongo katekisva di mura hellowol lohvna, Yesusva wonishovnamba, os nengvna, Yesusna moamba besal hevm, wo Yesusindam pronamba, Yesusm omnana, kam omno, hen Sesoana moamba mendekliva lohv? ²⁹ Doa Yesus omnana, honi Sesoana moamba mendekliva lohv, wo Moses novol vowel vena,

Yimba Israelnind yeoa hillivm, Yawe pina Sesoava einv, wo himba mongongasal einv, wo yeoa nom Yawem undnahonam nengeuvmona vinu, ten pina Sesoa einvm.

³⁰ Wo yimba osva Sesoamba und vivrava, wo manam yimba sambla undva vowel vivra, owai, mongawundna vivm, wo manam yimba ambo seposam vivav, owai, pepthanam vivra. *Lo 6:4-5*

³¹ Wo mongova Sesoana moamba mendekliva os novol velohv,

Yeo indhanamo os nesmos vowel vivm, os pev pevna nihm ten lelh vowel vivm. *Wok Pris 19:18*

Honi Sesoana moasambla mendekliva eluhunv pim.

³² Wo no katekis henga Yesusm omnana, yimba lehra oi, tanam yimba oi, Sesoava mongongal av, wo mongova avmoa. ³³ Wo hemangas pimba ind vinivra, wo ningminivra indnahonam, wo eva vevra, indhanam pi nesmos vowel vivra, os pivm men pi lelh avramana vevm. Doa hona wevsava, memba yimba kamba ishuniva, kuvhoav, wo pina wevsava ambo tuvulinv, hona wevsava memba pimba tatamba innemba weisumbulol ololohvpa huiva tempellava.

34 Doa Yesusva hellenamba, no katekisva nonoramsna ishov, oi pimba Sesoam mongawundna und vivra, wo hev omnana, yimba murapeta doa sihalm vev Sesoana nemeltindilm, mendahpeta vev.

Wo Yesusva ishopianamba, indkumbi pekmek vivna, wo hengava Yesusmba dasalmba ishuminamoa, humeis ata kana moakoklam indhana-musara moakus unvm.

Jesusva Unna, Katekisnamba Nengavangva Tuvulinv.

Matiu 22:41-46, Luk 20:41-44

35 Doa dawonam Yesusva mendah indhanam wonamana vevnamba, moa wonishomana vevna di tempelmera, wo he unna, yimba nonora, katekisva yemba os ishulvohinvna, si mongova indhanariniva provav Kristus, Sesoa hev si pusvundthoavav, pivm Yutanindm wolapho velm vevav, wo himba Devittindirini luhunvav, ten doara heva kuwul wulluhunnam. Tanam himba osva uv, heva os mongmomba men kava yemba ishunv. **36** Yimba nonora, doara Sesoasongol no Devitna nengavnangm otuhtna, wo Devitva noinda novol vena os,

Doa Sesoa kana mendeklim ishomnav Kristusm, os yemba kava mendeklielm pusvundthoav kavna nihanasis, osm kav men lohvm, wo si ungundmba yenamba ka engilinvav, yena keusingi lovahmanavav.

Buk Song 110:1

37 Wo hona moara Devitva os ona, Kristusva si mendekli luhunvav, oi Sesoa hev, wo kamba kuvhoavav. Doa es hevpa katekisva yemba osva

ishunvnna, Kristusva Devitna sespel si lohvav, wo Devitm kuvhoavavmoa?

Doa ombandhanamba indkumbiva Yesusmba hillivnamba, os uvna, pai, besalangas.

*Yesus Unna, Katekisnamba Wevsava Tuyulinv.
Matiu 23:1-36, Luk 11:37-54 eva 20:45-47*

³⁸ Wo Yesusva moamba mendah ishunvnamba ombandhanam, unna, yeoa novnovhora katekisna wevsanapenamoa vinu, manam yimba osva vivav. No katekisva kayenmba tokol vowel viv, kam unvra, himba nonora lovahv mendekli, wo musera di lovahmana vevna netesnalm. ³⁹ Wo himba sembayangduvra os vivna, hevm besalangas avhoapravna kuwulmsna, wo innemba dahwol vivnamba, himba indanam besalla aevulvna. ⁴⁰ Wo himba pelimba dasalm ovivnamba, wo wohva osva muehrombol vivna. Doa vivnamba, dasalm Sesoam ambo sembayang vivna, hevm selawosla vowel vivna indhanana novra, heva os owai, sewonamba si Sesoava hemba mindnam kinwondava plothowol vinvav honamba.

Mongo Peliongo Ambo Aiv Sambla Senmba Disumbra Vilipipohowolna.

Luk 21:1-4

⁴¹ Wo Yesusva mendahva diva tempelmera lohvnama, mura di disumbra avhoa, ambo non-galvna, sembayangnind sen aiemb vevnamba, di dembrapuv ve. Dinindva mindnam senmba mindnam dembrapuv vevna, ⁴² mongo peli pronamba, dihui amana vevna, wo ambo aiv sambla senmba vilipipohowole olpeli.

⁴³⁻⁴⁴ Wo Yesus nongle, hevtindim unna, hillu, yem ka ishuni, wo hev unna, yemba tanamolnam

kava unv, hona dinindva senmba mindnam dembrapuv vei, heva os mindnamba mendah wulav, wo no peliva dihui, wo nomba ambo senmba samblava vilipipohowolei disumbrava, wo noinda he kuelwolv no dinindmba. Manara noinda himba osva nengeimoa, inneram kavm wulav, owai, ambo vilipipohowolei.

13

*Yesus Tempelduvm Ona, Ungund Si Taka Vivav.
Matiu 24:1-14, Luk 21:5-19*

¹ Wo Yesusva tempelliniva nominiva ona phona, mongo hevtindirini omnana, nonglo, hona pina tempelduvpa besal hevm luhunv mendekliangas. Honna dembrina, honmba honamba seswit os i. ² Wo Yesus omnana, tanam hona deuvpa mendeklikumbi, heva os si sewonamba wohtaka vinvav, wo honmba honamba lohvavmoa, owai, pethara si velaiha luhungu vevav.

³ Doa nominiva tempellinimba wonganamba, wo olora wonpho, nomba olomba os ningthivna olivedenwit, wo avhoanamba hevpa tempelduvm henga nonglanga vawovna, doa Pita, Yems, Yon, Endru, hengas ambanamba, Yesusm sah ovri, ⁴ Henanam hevpa nomba si phovav? Esalm mani hevpa si phovav, wo noinda pimba ningvav, pina tempelduvm ata wohtaka vinvav?

⁵ Wo Yesus henga ishunna, yeoa novnovhora aevvm, indhanamba dasalm si humeis yemba sahokla vewol ovivra. ⁶ Si sewonamba indhanamba mindnam pulvuwl vevav, si os ovra,

mekava Kristusva provta, wo indkumbim indhanam gekala unvav, wo indhanamba si os uvav, tanamta. Heva os owai, mendah kanamba lohv.

7-8 Wo yimba si hillivav, no kembellava ten owalwol, wo yimba si nungeilvav, indhanamba owalwolrvava, wo si daoskumbi mongnind mongnind ohovav, no pethara no pethara ohovav. Wo si nenv vevra mongona kembella mongona kembella, wo si owous phovav no kembella no kembella. Hona sahoklasna si phovav, heva os owai, mendah kanamba lohv, wo mendah hona pethava lohv, manam yimba osva uvav, oi, meprovmi Kristusva. Owai, boasna sahoklava mendeklikumbi indhanamba si nongalphovav, oi ungevlirinim kelathamnav.

9 Doa hona sahoklava phovrava, yeoa beswonam novnovhora vivm. Noinda viu, indhanamba si os yemba katindimba wonishovav, wo buimera wolasuv vevra, wo sembayangduvra yemba monglamba si helvowol vivav, wo yemba si wonangavra kuwul mendekli indam, di yemba perkarra wonvivav. Hona plalmomba os lohv, men pev kana andra vivm. **10** Wo yimba nonamba beswonamba no kuwulmba ishunvra, kana nemelmomba ishunvra, wo osangasta kembelnindva ehahnindva indkumbi boasna kana besalmombra hillirava.

11 Doa nonamba kuwulva yemba ongowol vivrava, osva manandra yimba viv?, wo manam pemba yemba eiswol vevav, Sesoasongol hev yemba si os otuhowol vevav, wo moamba beswonamangas yimba ishuvra, manara nengara

mani pevna nengavnangnama yimba ishuvav, owai, Sesoasongol hev yemba otuhowol vevav, os ishu.

¹² Wo nonamba daosva ohovrava, wo si osva indhanamba wavrava ovalva unvramoa, wo etelva eva wohtivra, boasalamoa wangkomandhiu, himba Kristustindirini. Wo aralva ombolmba os vinvrata, wo tovotalva pulvovra, wohtivra, araravamoia helvakomo viuta.

¹³ Indkumbi yemba si os nungeilvav, katindi memba, wo noinda yemba si musk vinvav. Doa himba nomba keknamangasva lovahvrava, wo kamba maivetahuiva vivrava, hemba nomba Sesoava si hevalm nembaomana vevav.

*Yesus Mendah Ishongeinvna, Olhmona Ishona,
Mana Ema Sahoklal Si Phovra Yerusalemrava.
Matiu 24:15-28, Luk 21:20-24*

¹⁴ Doa yimba si indhanarinimba nunglivav hui Yerusalemra. Himba tihmonasharava si os lohvav sahoklal, snamba Sesoava os omnnavav, yemba kava ovomnav, wo kava kavna tempeldupva wohwuleihav noinda. Doa nonaoa pevoa Yutia provinsnindoa lelnam meishanam vovoha vevm, olora dawonam di aevvm.

Yimba memba honamba tombaimomba nunglivpa, yeoa beswonam ninginvm, wo yimba osva hona olhmopetava liheivav.

¹⁵ Wo no sahoklava phorava, wo nonamba himba nomba mendah ambara avra deuvrava, manam himba nomba hengaya merava deuvrava sihavra, wohva dambolmba, owai, lelnam ambo meishanam vohavm. ¹⁶ Wo himba nomba osorava andra vevrava, manam himba nomba gavra deuvramba, wulkalmba kayenmba

hevnamba, owai, ambo wailmonam wohgavra oloram. ¹⁷ Mongova ungevliriniva nonamba enamba avrava, wo mongova otolva lupulilva waiavrava, wavro, nonamba ambo sahokla nongal lohvav, saha vrivav lelnamba gapiambia. ¹⁸ Wo yeoa Sesoamoa elsus osahuwuvmonavm, os manam seponamba hona sahoklava kamba nongal lohvav, osombnam heva vera, lelnam osva kava gapiavav.

¹⁹ Manara, nonamba hona kinkumbiva indkumbimba si plotheinvav ora i, hona kinkumbiva mendekli hevm, seilva espetambo lohvna, Sesoia seilva hona pethava venamba, veiva daipota men, wo eva sewonamba si osva owaita. ²⁰ Wo nonamba Sesoava no kinkumbiva si eneha ambo wuleihavav, indhanam si humeis indkumbim dalvm. Sesoava monglava indhanamba doa doara kikih vowel vena hevtindilm, wo noinda si humeis nomba sihapiavm.

²¹ Wo nonamba mongova indhanariniva osva yemba unvrava, nunlu, men Kristusva, Sesoava hehonam pusvundthoana, doa men proi, wo mongova yemba osva unvrava, Kristusva no kembella doa phoi, wo manam yimba hilwul vivav, ambo gekala yem temba unv. ²² Moangakalanind snal si pulvovav, wo mana emamba mendekliva vowel vivra ombandhanam, osra luklukul vrivav, ambo uvav Sesoanamini. Himba Sesoanindm nomba dasalm vinvra, kam engalpethavra, heva os owai, Sesoava eva nongalihavavma, kava temba kikih vowel venamba. ²³ Doa yemba kava moakus uni, honamba si sewonamba os phovav, wo noinda yeoa novnovhora vivm, hona sahoklava mani-

mani yemba nongalphovrava.

Yesusva Unna, Si Kava Henga Provav.

Matiu 24:29-31, Luk 21:25-28

²⁴ Wo no sahoklava boasna nongal lohpiarava, wo nonamba kana prolm̄ba si os phovav.

Doa okombava lovhoavavmoa, wo weisva eva osta, ²⁵ wo paiva ovriniva velaral vevra, wo eva manimani nomba ovrava temba kek-namba lohvpa, monamba si owulihivav.

Aisaia 13:10 eva 34:4

²⁶ Kava arana ombol lohv, doa nonamba kava si tekohovrava petharam pihavav indhanana novra. Wo kavna pusambanakambava kana kura si os lovhoavav, yena novpa sowaivwol vinvav, wo an eva kana moamba piengavav, owainonoa. ²⁷ Doa nonamba kava si kavna ov-songolnindva wolanga vungu vevav. Vevrava, wo henoi katindimba kaina nembaomana vivav, nom Sesoa doara ten kikih vewol venam no petharinim no petharinim indkumbim.

Yesusva Unna, Yeoa Novnovhora Vivm Kana Prolm̄moa.

Matiu 24:32-35, Luk 21:29-33

²⁸ Doa Yesus henga unna, hona olhmom kek-nam kana hillivm, timba polva engsihaiva, wo ningilva nemelva pehlothovpa, wo yimba os ningv, doa mura osombva pholm vev. ²⁹ Doa yimba nomba nunglivrava, yem kav men seilm ishunim, wo osva yimba nonora ningvav, ora Yesusva mura prolm vev. ³⁰ Tanam, mani wenokombonamma, monglava yeriniva si mendah lovahvra, himba si os nunglivav novnamba. ³¹ Tanam kava yemba ishunv, ovna pethanamba

si umharavhoavav, heva os kana moamba si wohlohvav.

*Jesusva Unna, Aramba Hevhoangas Nonorava
Av, Ombolna Prolmba.
Matiu 24:36-44*

³² Wo Yesus henga unna, kava si homba petharamba henga provav, wo indhanamba tit viv honamba, oi henanam si Jesusva provav? Owai, Sesoana ovsongolnindva eva tit vivta, kavpa eva tit vevta, Sesoangas kanarangas nonorava av. ³³ Yimba eva tit vivta, wo noinda yeoa undundna aevvm.

³⁴ Men kava olhmona ov, os indhanarini hevna denwitm os vevav, indhanamba unvav, kana denwitmoa hui lengwol vewuvm kavnasiraoa. Mongo no andra, mongo no andra os unvav. Wo galmba verava, mongom no andranindrinim omnnavav, denwitmoa kanamo kekalvho vro, henga kava si prorava, wo daha henga yeoa kamo kavna denwitoa os wuleihamno.

³⁵ Doa Yesusva olhmomba wuleiha, wo henga hevtindim unna, hona olhmomba yeoa keknam wuleivvm, wo undundna aevvm, yimba tit viv, henanam kava hengava si provav. Kava si ambo kuimbsuwenamgava pihavav, ora simolnam, ora okomba vohanam, ora sinim. ³⁶ Manam yemba gimus vivav, wo kava si mura prolmba vevrava, yimba kamba nunglivavmoa. ³⁷ Yemba men kava ishunv, wo eva indhanamba indkumbimba kava os ishunvta, yeoa undundna vivm kanasiraoa.

14

*Ungevlirini Yesusm Wel Sandana Kuval
Sovhomnana.*

Matiu 26:1-5, Luk 22:1-2, Yon 11:45-53

¹ Wo sembayang andranindna kuwul eva katekis kusonamba, hevm ishue, es pivva si Yesusmba poaitava kevrirava, helvakomandhalm? Hev ningna, sambla simba elohv, wo indkumbiva kusovav, wo innemba hlavav huiva Yerusalemrava, nomba innemba osva hlavav, ningvra, Sesoava simbehumunilmba selva wonphona Isip petharini. Nonamba rotiva hlavav yishui. ² Wo no kuwulva ishuvna hevm, aembu, manam pimba Yesusva hona innenindna novrava kevrivav, wo buiram waianga, pimba ora muserava kevrira, wo pimba himba helvowol vivav. Poaita ambo kevrivav.

*Mongo Ungevlirini Welsanda Yesusna Kura
Sovhona Novnovhora.*

Matiu 26:6-13, Yon 12:1-8

³ Wo nonamba Yesusva mongona deuvra avna Simonina, no deuvpa Betani kembella, no Simonmba doara lombamungil anamba, doara selpuemnana. Wo inne di ona wonnawona, mongo ungevlirini botel sanda wulprona, botelva nomba besal hevm, no sandava teihnungva besal hevm vevna, diva os lohmanavna i. Wulpronamba, kewul powalnamba, doa Yesusna kura sovho, osm vevna, Yutanind ten indhana mindilm sovhowol vinvnam, os singvi.

⁴ Wo nonamba monglava no indhanamba musk vivna, hevm ishuvna, esm hevpa himba hona sandava ombamba sovhov? ⁵ Hona sandava pimba

doarava maketramba wulangatava, pimba diva eva ata os dumbtami mindnam, os 300 kinara phota, wo innehuinindm moang vi. Wo noinda no ungevlirinimba okusv vina.

⁶ Doa Jesus unna, manam yimba okusvvav, sahokla ovriv, ⁷ mani sahokla veima, kam memba undnahonam beswonam vrei. Yimba innehuinindmba moang velm vinvrava, viu, men euvmona velvhvm. Heva os kava owai, mani yemba kava mongawulm si wohwonamana vevavma, osva yimba kamba si vruwuvmona vevav, owai. ⁸ Wo hona ungevliriniva memba kamba sandanamba sovhoholothomniva, memba osm kamba vemni, yimba si os kamba vinivav mindilva. Mongova monamba lohvmoa, kamba okolalmba.

⁹ Tanam kava yemba ishunv, kanamba moamba honamba besal si os hellenguamana vethavav indakonda petharava, wo hona ungevliriniva memba veiva, si eva henamba osta hellenguamana vethavavta, wo indhanamba si beswonam hemba ningminiv, besal.

*Yutasva Yesusmba Indthueinilm Vevna
Ungundmba.*

Matiu 26:14-16, Luk 22:3-6

¹⁰ Doa nonamba mongova hevtindirini gana, nihilva Yutas Iskariot. Ganamba, himba sembayang andranindna kuwulm moam ishomnalm geinna, unna, ka yemba si indthueinvav, osva men Yesusva, wo yimba nonamba si kevrirava, buiram waianga, os pev men ningminivm. ¹¹ Wo kuwulva hillinamba, indk vithivna, umnina, yemba kava si di dembreahuav. Wo doa Yutasva nengvna,

henanam si kava indthueinvav, osva Yesusva men?

Yesus Hevtindim Tihm Wonnelm Velm Vevna Pasova Tihm.

Matiu 26:17-25, Luk 22:7-14 eva 22:21-23, Yon 13:21-30

¹² Wo rotiva yishuiva nonamba hlavnamba, nengewuvna, Sesoava tomonalmба seilva wonphona Isip petharini, wo sipsip miklewol vivnamba, wehla ve. Doa nonamba Yesustindiva Yesusm umnina, yimba es nengv, ata kava henideuvram angavav, no sipsipna nihilva huhul velmba, wo pimba hla? ¹³ Wo hev samblindhanam unna, Yerusalemram dem esihoho, wo diva yimba monarava mongova tendorinimba ata anongla evevav, no tendoriniva po guavav, hem ehengpethota. ¹⁴ Wo ata himba mongona deuvram gavav, doa yeoa sis enggo, wo no deuvna aralm ohosahmano, pina guruva os oi, yimba kamarva venamba mendekliva, hi lohv, no kamarrava kava ata no sipsipna nihilwoniprovav wonnelmba?

¹⁵ Wo no deuvna aral yemba ata wonvongavav no kamarram mendekliram. No kamarva sena lohv, wo tikarva manimani os nalohv, ata pimba lehra hlawuvav, wo yeoa di meilna eveota no kamarra. ¹⁶ Doa no hevtindirini samblava mi enga Yerusalemram, wo osoa enonglana, ten Yesus hev ishunnam, wo di innemba meilna evenata.

¹⁷ Doa simba okilrvavnamba, Yesusva no deuvrava wonphovna, ¹⁸ doa hevtindim 12pelaram mongawulm wonnawovnamba, doa Jesus unna, yemba kava tanam unv, mongo yerini kamba ata ungundmba indthueinvav, honi yerini men

piv mongawulm hlavm. ¹⁹ Wo undva henamba potra pihengu vinvna, hevm os ningwul vevna, an hevpa dihi, wo henoi henoi ovna, kamma, owai? ²⁰ Wo Yesus henga unna, men kava yem mongawulm wonnevml mongawa sospanda, pev honi ambo ata.

²¹ Kava arana ombol lohv, wo doara doa tombairava novol vina, kamba si helvakomandhivav, wo kamba si osva dahavavta, tenovol vinam. Heva os himba nomba yeriniva kamba ata ungundmba indthueinvavpa, heva hevm umniv wavro. Manara, noinda si hemba sesmba sewonam kinwonda plothomnavav, wo nihsesoava venavav os i. Himba si os ovav, mani avamba kamba osm lengnama?

Yesusva Rotina Wainna Dahwol Vevna Hevtindim.

Matiu 26:26-30, Luk 22:15-20, 1 Korin 11:23-25

²² Doa mendahva wonnevnama, Yesus hev rotiva vranamba, wo Sesoam ishovongo venana, lehra yimba kamba dembrahuni, wo rotiva nomba popowol venamba, doa pavmong vine hevtindim, wo unna, dumbu, hla, kana nihil memba. ²³ Wo wain eva mokna vra, Sesoam henga ishovongo venana, lehra yimba, wo unna, hla, doa ambo mongawa mokna hlana. ²⁴ Wo Yesus unna, hona wainmba memba kana tovol. Doa tanam kamba ata dahavav, wo kana tovolva ata os sovhopevav, indhanamba mindnam kolvwrowolalmaba. Osm yimba liheivav, Sesoa tanam ishunv hevtindimba.

²⁵ Doa tanam kava yemba unv, hengava wainmba kava si nevavmoa, verava kava si sewonam wainmba nemelva nevav di Sesoainda.

26 Wo wonnepianamba, Sesoam sangal wonsevramnanamba, wo nominiva wonganama, henga indhanahuiram wonganamba oloram, no olomba os ningthiv oliv denwit.

*Yesusva Pitam Omnana, Ata Yimba Unvav,
Yesusm Kava Tit Vrev.*

Matiu 26:31-35, Luk 22:31-34, Yon 13:36-38

27 Wo Yesus unna, ata yimba kanaminiva pem bukethavav, kana ungundnapenam, os doarava Sesoana moashulnindriniva tombairava novol vena, Sesoa sipsipna kekalvhonindrinimba si helvakomandhavav, wo noinda sipsippa pem bukethungu vevav. *Sekaraia 13:7*

28 Doa Yesus henga unna, osta detiva ata phovav, heva os henga si kava beswonam pokamariniva phovav, wo kasna si miva yemba desumbi gavav Galili provinsramba. **29** Wo Pita omnana, owai, yetindiva indkumbiva pemba angatava, kava owai.

30 Doa Yesus Pitam omnana, tanam hona simimba ata yimba os ovav, kava Yesusmba tit vrev. Ata honamba moamba samblamongolm opiowol vevav yimba, wo ayamba samblalm mendah opiowol vre. **31** Wo Pita mindnam henga omnana, owai, pimoa mongawulm endahowolla, heva os kava osva ovavmoa, kava Yesusmba tit vrev, wo hevtindiva indkumbiva osangas umninata.

Yesus Sesoam Sembayang Vawona, Kana Kinwonda Nengas Pipahamno.

Matiu 26:36-46, Luk 22:39-46

32 Wo nominiva wonganamba, Getsemani pethara wonpho indhanahuira, wo Yesus unna

hevtindim, yeoa hui aevvm, kava ata dem gavav, Sesoam sembayang venalm.³³ Doa Yesusva Pitam Yemsm Yonm nomangas demba wongana, wo hevpa di duuskumbi vevna, ata kamba kinkumbi plothomnavav, kamba helvakomandhivav.³⁴ Wo himba no samblamongolm ishunna, kamba kinkumbi venav, kamba ata daipota hui dahavmi, kavvei. Yeoa hui aevulvm, novkaka aevvm, kava dem gav.

³⁵ Doa hev espeta ganamba, pethara plakope duusnahonam, daikaka vungavna, wo os Sesoam aralm sahvungo venana, es hevpa honamba kinkumbi kamba plothomnavna, lehra ye nengas pipahamnav,³⁶ wo heva os kana moarava manam yimba nengas pipahamnavav, owai, pevna nengavnangna ambo veo, ora owai.

³⁷ Wo henga ona prona, pai, samblamongova ninshav, wo Simon Pitam omnana, Simon, manam yimba liv? Espetava yimba novkakava avnamoa kanisrava.³⁸ Yeoa novkaka aevu, wo Sesoam osahuwuvmonavm, ata homeis yem plel vevm hona kinda. Tanam yimba kam engpetvolm vev, heva os owai, yemba gimus vinv.

³⁹ Doa Yesusva hengava espetava ganamba, Sesoam osahmana, os doara hev ten seilm osahmananam,⁴⁰ wo henga engilpranamba, ona, pai, ninshav, henga nitata vinvnamba. Wo Yesusva sah owol vevnamba, himba lous vrivna, moamba sesva ishomnalva.

⁴¹ Doa henga ganamba, henga Sesoam osahmanana, wo henga engilpranamba, nongalna, mendah ninshav. Wo unna, mendah yimba shaolavma, doata. Kava arana ombol lohv,

heva os ata kamba sehsimbihal indthueinvav indhanakoklam. ⁴² Pulvo, nunlu, no sehsimbihalva doa proi, kamba indthoalmba.

*Yutasva Yesusm Ungundna Englisra
Holvonithinna.
Matiu 26:47-56, Luk 22:47-53, Yon 18:3-12*

⁴³ Doa Yesus mendah wonishovna, wo Yutas phona, no Yutasva mongo hetindirini. Himba desumbi provna, wo indkumbi noinda pelklei-hamna, ovlatenga himba iambvna. No indkumbiva himba os ambna Yutanindna kuwulna moara, katekis, sembayang andranindna kuwul, mundil, honamba kuwulva wolanga vina hemba.

⁴⁴ Wo Yutas doara no kuwulm ishunna, ata kava garava, hemangas mapotho ovre, pev u, ten Yesusvata, nom kava kevralmba ambv, wo os wohkekkel viuta, waianga, wo novnovhora waiangavm.

⁴⁵ Doa Yutas pronamba, omnana, guru, doa Yesusm mehtat vene, osm vena mapotho ovre.

⁴⁶ Doa noi indkumbi prapianamba, Yesusm kekel vi. ⁴⁷ Doa mongo hevtindirini phonamba, ovla hevna selvoramnanamba, mongo no andranindrina angol singeitpipahamna, no andranindrina tempelna kuwulna andranindrini.

⁴⁸ Doa Yesus unna, mani kava daosnindrini avnama, noinda yimba ovlana tenganamba wul-prapiavna, kamba helvalmba? ⁴⁹ Elsus kava no tempelduvrava indhanamoserava wonamana vevna, wo owai, yimba nonamba kamba kevri-namo diva. Wo os doara Sesoana moashulnindrini tombaira novol vena, osva noinda yimba kamba wohvenalm viniyta.

⁵⁰ Doa nonamba hevtindiva pem bukethana, wo Yesusva hevho ungundna englisra lohvna.
⁵¹ Wo mongo tuendisrini kayenpetava ambo vethanamba, wo Yesusm sis engpetha novolm, wo ungundva nunmlinamba, ona, mongo hetindirini, wo ona kevrina. ⁵² Heva os owai, kayenmangas himba kevrimnina, hevoa snilung nihps wohgana.

Yutanindna Kuwul Yesusna Plalm Aslalvna.
Matiu 26:57-68, Luk 22:54-55 eva 22:63-71, Yon 18:13-14 eva 18:19-24

⁵³ Doa Yesusmba waianganamba, tempelna mendekli kuwulinda di waipulvo, di Yutanindna kuwul indkumbi kusovnam, tempelnindna kuwul, mundil, katekis, honi kusovna diva.
⁵⁴ Wo Pitava sis engilguavna, wowonam ambo gavna. Venamba, siha pueilmera no kuwulna deuvpethalla, wo suwera pathavhueinna, poaita ambo avho kekalvhonindmongo.

⁵⁵ Doa noi kuwul di moakumbi wuleindavna Yesusm, osm aslalmanavna, manamoara, mani venamba, noinda pimba ata duangm umnivav, helvakomandho? Heva os owai, aslalloh venamba. ⁵⁶ Wo indhanamba mindnam diva lovahvna, dasalm ambo umnivna, Yesusva os vena, heva os owai, mongawamomba ishuvnamoa, indakondamoam ambo eishu vruwul avna. ⁵⁷ Wo mongla no indhana opulvonamba, umnina, ⁵⁸ kava os hillina, os Yesusva ona, si kava tempelduvpa taka vindava, nomba indhanamba temba dembrinamba huiva Yerusalemrava, wo mongo tempelduvpa henga kava si vevav, samblamongo okombanam vevav, no tempelva indhanamba vivavmoa, ambo kava kavho

vevav. ⁵⁹ Heva os gekala ambo olvohvna, mongawamomba tanamba ishuvnamoa.

⁶⁰ Wo noi sembayang andranindna kuwul hev hovra lohvhoanamba, Yesusm sah ovre, es eva ata yimba ishovav hona wetatmomba yemba memba umniva? Yimba moamba sesva wuluhunvmi owaimi? ⁶¹ Doa Yesusva moanghui ambo lohvna, moapetava osva sevranamo. Wo himba henga sah ovri, es hevpa yimba Kristusma? Sesoa yem men pusvundthoanam, osm kam Yutanindm kolvrowol velm? Yimba Sesoana ombol tanam ambo lohvmi owaimi, nomba temba pimba hemba okuliv?

⁶² Doa Yesus ona, evasalm ka honita. Kava arana ombol lohv, wo yimba si kamba henga nunglutithueivav, kava si Sesoa mendeklina nihanasis avav, temba keknamangas lohvpa. Doa nomini henga si hona petharam kava provav, wo nonamba yimba kamba si os nunglutithueivav, kava tekohovra si pihavav.

⁶³ Doa tempelna kuwulm wusprovna Yesusna moara, wo noinda hevna malom powale, ona pimba doa Yesusnamba moamba hilli, manam mongmomba indhananamba hillinvav, owai. ⁶⁴ Sesoamba himba doa sahokla ovrei, oi, kava Kristus, Sesoai lohohra kava elohv. Es hevpa yimba ningv? Es hevpa pimba vinivav hona indhanarinimba?

Wo kuwulva nomba indkumbi mongawamomba mindnam hevm ishuvna, ambo duangm wohtivra helvakomandhalm. ⁶⁵ Doa monglava muembkosvna wehlavna, wo monglava novlomosm kayenna ehlithiminivna, wo ohilvivna, dasalm umnivna, an yemba helvav,

sevro, yimba nonoanindrini lohvtava. Wo kekalvhonindva kevrinamba, englambambna sang pulavna, helvuwul vevna.

*Pita Ona, Yesusva Kava Tit Vrev.
Matiu 26:69-75, Luk 22:56-62, Yon 18:15-18 eva
18:25-27*

⁶⁶ Wo Pitava mendah di suwera deuvpethalla avna, doa mongo ungevlirini phona, kuwulna andranindunguvlirini, ⁶⁷ Pitam nongla, wo muram suweram pronamba, liha, wo ona, yimba Yesustindirini men Nasaretrini.

⁶⁸ Wo Pita omnana, es yimba ov, kava tit vev. Wo nominiva Pitava gana, ona tuvra pholm, wo lilnam ayamba ophona. ⁶⁹ Wo henga nomba ungevlirini nonglana, wo nom indhanam unna, ten deuvpethalla aevvnam, os hona tendoriniva memba Yesustindirini, ⁷⁰ wo henga Pita ona, owainonoa. Wo dawonam no indhanamba umnina, tanamta yimba esm osalv, yimba Yesustindirinita, manara nengara yimba Galili provinsrini, moamba yenamba indanampeta.

⁷¹ Doa Pita unna, kava tanamolnam ov, kava gekalava otava, ata Sesoava kamba sahokla vrevav. Kava tit vrev, hemba nomba yimba temba umnivpa. ⁷² Wo nonamba Pitava ona ishollohnna, ayam opho, seilm ophoi, eva men henga ophov. Doa Pitava nengra, Yesusva honam kamba doarava ishomnana, os honi sinimba yimba ata penahonam samblamongolm osalwolvav, Yesusva kava tit vrev. Wo yimba osva ata ishopiarava, doa ayamba ata henga ophovav. Doa Pita duuskumbi venavna, wo mindnam wo ve.

15

*Yesusm Duangindam Ningulangana.
Matiu 27:1-2 eva 27:11-14, Luk 23:1-5, Yon
18:28-38*

¹ Wo lingil lihavnamba, no Yutanindna kuwul indkumbiva moapetava henga ishuvna, ata es hevpa vinivav Yesusmba? Wo moamba ishopieinamba, ata os vinivav, wo polisi Yesusmba saongna ningina, wo ningulanga Pailat duangindam. ² Doa di henga Pailat sah ovre, es hevpa yimba kuwul mendekli wulluhunvma Yutanindna? Doa Yesus ona, ten ye oimta. ³ Wo no kuwul, ten doara hev kevrinam, noi osva moangakala ovrivna, Yesusva os vevnata, osm Pailatm dasalm ovrivna. Os ningvna, Pailatva ata Yesusmba helvakomandhavav kana moara. ⁴ Wo Pailatva henga Yesusm omnana, yemba ambo mindnam indkokla ovriv, es yimba ata sesva ishunvav? ⁵ Wo Yesusva moamba hengava ishonamoa. Doa noinda Pailatva os nengaloh vevnamba, pai, hona indhanariniva es hevpa?

Pailatva Wohnta, Yesusmba Lepethalm.

Matiu 27:15-26, Luk 23:13-25, Yon 18:38 - 19:16

⁶ Wo Pailat duangna wevsia os lohmanavna, Yutanindva no innemba mendekliva hlawuvnamba no tahonnam no tahonnam os hlawuvna, wo mongasal buinindriniw wolapho vawovna Yutanindna moara. ⁷ Wo nonamba mongova indhanariniva buimera livna, nihilva Barapas, wo himba daosnindm engalpethanamba, duangna valgonindm engvapingilm vevna, wo indhanamba helvakomo vivnamba, noinda bui vina. ⁸ Doa Yutanind

mindnam prapianamba, Pailatm sah ovri, kam os vinu, mepev doara velohvm, mongongalm buimerinim wolaihapho.

⁹⁻¹⁰ Wo Pailat nengna, honi indhanamba Yesusmba musk vinivmoa, kuwulangas hev Yesusmba muembnavho vriv, wo noinda Pailat unna, es yimba ningv, Yesusm kava wolaihaphovavma, men yena kuwul wulluhunvm? ¹¹ Doa sembayang andranindna kuwulva di mura lovahvna, no moamba hillinvnamba, wo ombandhanam otuhtina, osm mindnam Pailatm umnira, os Barapasmoa wolaihapho, Yesusva owai.

¹² Wo henga Pailat osah owol ve, es ata kava eva venavav Yesusmba, memba osva yimba ningthivpa, Yutanindna kuwul? ¹³ Doa he di mindnam umnina, pakona hemoa tira krusera lepetheiu.

¹⁴ Doa Pailat henga unna, owai, heva os mana vemakoklava venamo. Wo henga he di mindnam umnina, pakona lepetheiu krusera. ¹⁵ Wo Pailatva hena moamba hillinnamba, wo Barapasm wolaihinginna, doa Yesusm hevna valgonindindam wolaihangavna, wo valgonindva ambo esvema di Yesusmba hilvi wepondanasna. Doa Pailat hevna valgonindm unna, pakonaoa daha os lepetheiu.

Valgonindva Yesusm Dasalm Moari Ovruuvuva.

Matiu 27:27-31, Yon 19:2-3

¹⁶ Doa valgonindva Yesusmba waianganamba Pailatduangna pueilmera, wo indkumbim valgonindm nembapho vi, nonglalm. ¹⁷ Wo Yesusmba kayen aembul vithimninamba, wo topilm wesel

nasna weilvrimnina, wo kura weilholothumnie Yesusm, dasalm ambo osm ora memba kuwul.

¹⁸ Doa Yesusm dasalm ambo moari ovruwuvna, yimba Yutanindna kuwul a? ¹⁹ Wo tengana kuval hevri, wo muembksvna wehla, wo dasalm mulumbdandna ambo lovahthamnavna, os kuwulm ten vewol vinivm. ²⁰ Wo osva moari vepiemninamba, wo kayen aembulva henga selvoreimnivna, hevna henga vithimnivna, wo Yesusmba waianga, kruseram lepethalm.

*Valgonindva Yesusm Krusera Pakona
Lepetheina.*

Matiu 27:32-44, Luk 23:26-43, Yon 19:17-27

²¹ Wo Yesusmba monara waiangavna, mongo indhanariniva provna monam, nihilva Simon, oklamini himba provna, wo Yerusalemram pholm vevna, no Simonmba Aleksandaina Rupusina aral, wo Sairini kotanindrini. Doa valgonind umnina, Yesusna kruseoa pungao. ²² Wo Yesusmba dem waipulvo, nomba os ningthiv Golkota nomba olomba, osm ovna, oi indhanana kukel.

²³ Wo Yesusm wainmba daholm vivna, no wainmba obatnahonam moakot vinamba, osm daholm vivna, ata humeis nihsesoa venavm, heva os owai, Yesusva nenamoa. ²⁴ Doa pakona kruserava hevpa lepetheinamba. Wo Yesusna malova dumbnamba, doa pilai win vivna, osm hevm moang viwul vina mongom mongom.

²⁵ Wo Yesusmba nonamba krusera simolnam lepetheivnamba, dihi os yamba 9pelara vevna. ²⁶ Wo valgonindva nomba hevna volm vina, wo

krusesra sena os moapeta tombaira kleihina, osm hona moara lepetheie, wo os moapetava kleihina,
MEMBA YESUS, YUTANINDNA KUWUL.

²⁷⁻²⁸ Doa indhanarini samblava di Yesusinda murapeta krusera lepethiwulna, nomba indhanarini samblava helvakomonindrini sambla, lepethiwulna noinda. Mongova sihanasis eva mongova nihanasis, os lepethiwulna. ²⁹ Doa indhanamba di monarava kohawovnamba, wo Yesusm nonglavol ovovna, loskas ovrakov ovrivna, ye honi kana tempelduvpa Yerusalemrinimba taka velva olahvnama, wo ovna, kava henga si samblamongo okombanam ambo dembravav? ³⁰ Pev doara ten indhanam wolapho vevnam, eva os pevmoa wuleihota, kruserinioa holopeo.

³¹ Doa no Yutanindna kuwul indkumbi os hevm moarialm ishune, pim wolapho velm prona hona pethara, heva os hevpa owai, kruserinimba holopevmoa. ³² Ai Sesoava yemba tanamba doarava pusvundthoatava, wo tanam yimba kana kuwul wulluhunvtava, wo daipotaoa kruserinioa os eva holopeota, wo yemba kava undnahonam lovahthamnavav, tanam lehra lohv. Wo no daosnindrini samblava hevna kruse pethalliniva eva ohokosv venata Yesusmba.

Yesusmba Os Wohvitivhoana.

Matiu 27:45-56, Luk 23:44-49, Yon 19:28-30

³³ Wo okombava hovrava lohvnamba, doa heva os simsna okilvra, venamba, okomba vohanam yam 3pelara vena. ³⁴ Doa nonamba Yesus hevnamona kinge o, os eloi eloi lama sapaktani, osm ovna, kana Sesoa, kana Sesoa, manara yimba kamba nunglulihai?

³⁵ Doa mura mongova di hillilvahvna no moamba, wo os una, pai, hillu, Yesusva Elaitam wunuhomnav, ten doara heva amana venam. ³⁶ Doa mongo indhanarini lelnam ganamba, lembatamsna vranamba, wainpolla velthanamba, wo tenglara lothonamba, wo Yesusm mengval nethavongovna mengutilm. Wo ona, piv dawonam nunglul lovahv, ata Elaita provmi, wolaihapihavmi owaimi? ³⁷ Doa Yesusva eunillam kinge onamba mindnam, wo wohdaha.

³⁸ Doa wohdahanamba, wo mana vema os phona tempelmera di Yerusalemra, wo kayen-mba mendekliva merava tempelduvra kleihalo-hvnamba, mongo tuvra diva kleihalohvnamba, wo heva hev ambo hovrahovra powalwolna. Os powalwolna dipeh, venamba dingoho. ³⁹ Doa Yesusva nonamba dahavnamba, wo mongo val-gonindna kuwul nunglul lohvna, Yesusva hena novra wohdahana, wo hev ona, tanamolnam hona indhanariniva Sesoana ombolta.

⁴⁰ Wo eva mongova ungevliva okla lovahvna, nonglanga velvohvna. Honi lovahvna, Salome, Maria Maktalarini, Maria Yemsina Yosepina aval, no Yemsva boasalal lohvna. ⁴¹ No ungevliva doar-ava engpethalvohmana vevna, Yesusva diva Galili provinsrava andra vevnamba, wo hetindim in-nemba dawol velvohvna. Wo mongla ungevli mindnam di eva Yesusm nunglul lovahvna, ten Yesusm Galilirini Yerusalemram doara engamb-nam.

*Yesusmindmba Honmera Singvina.
Matiu 27:57-61, Luk 23:50-55, Yon 19:38-42*

42-43 Okombava pelangalla avnamba, wo mongova Yutanindna kuwul provna, nihilva Yosep. Himba besal lohvna, Arimatis kembellini. Wo himba indva wulluhunvna, Sesoava si hevna nemeltindimba beswonam wonavav, wo himba nom nengaomana vevna.

Wo himba doara nengna, simba ata kilvrvav, simerava temba vah iaevulvav. Wo es hevpa Yesusva mindilva vindkleihalohvav kruserava. Ambo os nengvna, ambo ka gavai, Pailat duangm osahmana, es hevpa Yesusmindmba kava ata detiva singvivavma? Wo pepehtovpa piengana, ambo nis ganamba, Pailatm osahmanana. **44** Wo himba hellenamba, ona pai, es hevpa Yesusmba lelnamba dahai? Wo wunuhomna valgonindna kuwul, noi wulluhunvnam, wo sah ovre, es hevpa Yesusva doa dahaimi, owaimi?

45 Wo no valgonindna kuwul omnana, doa dahaita, wo noinda Pailat Yosepm omnana, wouta gao, vindpipahota, wo singviu pokamara.

46 Wo Yoseppa ganamba, kayen dombal nemel sovakanamba, wulpro, Yesusm kruserini vindpipaha, no kayenna ninganamba, honmera yitha, no melva doara hina indhana hev. Doa hon mendekli vaval umharavho vrunganamba, no melva ehlatha. **47** Wo Maria Maktalarinii, Maria Yosepna avali, himba nonamba di nunglul elohvna, Yoseppa Yesusmindmba honmerava vindithavnamba, ona nolhra ten.

16

*Yesusva Henga Beswonam Phona.
Matiu 28:1-8, Luk 24:1-12, Yon 20:1-10*

¹ Sapturava ve pieinamba, doa no sinimta ambo Salome, Maria Maktalarini, Maria Yemsna aval, hona ungevli samblamongo anganamba, welsanda sovawol vehalvna. Nomba wel sandava besal hevm teihnungva vevna, wo no welva Yesusmindm pokamararam selvolm iangalm vevna. Yutanindna wevsana himba iangavna. ² Minguram okombava bonamostava vevnamba, dem anga pokamararam, ³ wo olongovnamba, hevm ishune, an pimba ata kollombvav, honmba nomba pokamariminba velavhoalmiba? No honmba mendekliva pokamariniva. ⁴ Doa pokamarava diva pulvonamba, nunqlina, pai, honmba doa ahnam umharavho vrulangai, melva os velaihalohv. No honmba mendekli. ⁵ Doa mellava saivnamba, ona nunqlina, pai, mongova tuendisriniva malo dombalna tokolna men av nihanasis, wo ungevliva pemba os vivna i.

⁶ Wo himba unna, yimba manapenam viv? Yimba Yesusm Nasaretrinim aslalalm ambei, ten krusera dahnam? Owai, huiva vindilvmoa, doa henga beswonam phoi. Nunglu, men honinda vindil liheinata, wo vindilvmoa. ⁷ Doa henga angota, Pitam, mongla hevtindim os ishunu, doa Yesusva mi yemba desumbi gai Galili provinsram. Wo di si yimba hemba nonglapulvovav, os hev doara ten yem ishunnam.

⁸ Doa ungevliva mindnam pem vivna, eiswol vevna, pokamariminba vinamba, lelnam anga, pepehnahonam ambo angavna, monarava himba ishunvnamoa indhanamba.

Nonglana.(16:9-20)

Matiu 28:9-10, Yon 20:11-18

⁹ Wo nonamba Yesusva pokamarinimba simolnamba phonamba minguram, wo seilva himba Maria Maktalarinism nam ishokamnana, no Mariana nihmerini himba doara 7pelara tihsongomba engilpingu venanamba. Noinda nonglana, heoa kam lihara, kava beswonam lohv. ¹⁰ Doa nonglanamba, Mariava silelguawol vevnamba, Yesustindim ishunilm. Wo himba mendah duus vinvina Yesusmindm, os wuo ovna. ¹¹ Doa Mariava unna, Yesusva henga doa phoi, kava doa nonglai. Doa himba os ningvna, gekala ov.

*Yesusna Aonghal Mahalnindrini Sambla
Yesusmba Enonglana Monara.*

Luk 24:13-35

¹² Doa Yesusva indanampeta nilhana, wo hevtindirini sambla himba mongona kembellam engavna oklapetam, wo hev engilpetha. Wo henga sism osva enengna, Yesus hev memba. ¹³ Doa no samblava henga eprinnamba hevtindi indam, ihishune, kava Yesusva doa enonglai monara. Wo nomba ninginvna, gekala ohov.

Yesusva Hevtindim Ishunyna.

Matiu 28:16-20, Luk 24:36-49, Yon 20:19-23

¹⁴ Wo dawonam ambo mongawulm hevtindiva 11pelara avhoapronamba, inne hlavna, doa Yesus di heva hev ambo hovra phune, wo koasromb vevna, manaram yimba osva uvna,

(16:9-20) 16:8: Nonoanindva os uv, Makva owai, honamba moapetava novol vowel venamoa. Mongo indhanarini novol vowel vena.

Yesusva phonamoa pokamarinimba? Monglava indhanamba yemba ishunvnamba, osva Yesusva doa kava nungli, wo yimba os ningvna, gekala uv, yimba undhui lovahvma? ¹⁵ Yeoangawul veota, mongona kembellam, mongona kembellam hona petharaoa, wo kana nemelmoa besal wulvahmana vinu indkumbimoa.

¹⁶ Doa himba nomba kamba osva undnahonamba lovahthamnavrava, wo henomoa pona pusvu, hemba nomba Sesoava si lopshavav. Wo himba nomba kamba lovahthamnamba owai vevrava, Sesoava si hemba nomba os unvav, yenamba sahoklal luhunv.

¹⁷ Doa himba nomba kamba keknamba lovahthamnavrava, himba nomba os vivra, tihsongova indhanana nihrinimba engilvra, kana nihilm os sevrivrava. Wo himba nomba moamba ishuvav, ten seilm tit vivnam, ishuvnamoa. Wo indhanamba nungeilvra, uvra, Sesoanamini.

¹⁸ Wo eva himba nomba os vivra, saiholava kevrivra, wo mana emamba sahoklalva hlavra, wo noindava dalvramoa. Wo eva himba englana huhlinvra uvavulmungilmba, wo hemba nomba kanandhawol vevra.

Sesoava Yesusmba Waivongana Hevindam.

Luk 24:50-53, Aposel 1:9-11

¹⁹ Doa Yesusva hev mendekli hona moamba ishopieinnamba, Sesoa waivongo hevindam, wo murapeta hevinda nihanasis desvhoana kuwul mendeklielm. ²⁰ Wo hevtindiva bukethungu vena, wo no besalmoa Yesusna indkumbim isholvohmana vinvna, mongona kembella, mongona kembella. Wo mendekli hev poauothowol vevna, wo himba mendekliandra

Makna Yesusmoa. 16:20

xcvii

Makna Yesusmoa. 16:20

vewol vivna. Wo noinda indkumbiva osva
ningvna, Yesusmomba tanam.

Doata Makna Yesusmomba.

**Sesoana Besal Nemelmoa Walsana Moana
Genesis, Ruth, Jonah, and The New Testament in the
Waris Language, also called the Walsa Language, of
Papua New Guinea**
**Buk Stat, Rut, Jona, na Nupela Testamen long tokples
Waris long Niugini**

Copyright © 2002 The Bible Society of Papua New Guinea

Language: Walsa/Waris (Waris)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 24 Apr 2020

81136742-8dfd-57f5-95ae-cd3afb267b0d